

小

畜

集

開化圖書館

Kaichua Library

六

開化圖書館

Kaifu Library

開化圖書館

Kaichua library

開化圖書館

Kaishua library

王黃州小畜集卷第二十六

擬試內制五題凡四副

鄉老獻賢能書賦

宮漏出花遲詩

雲州節度使加使相麻

搜訪唐末已來忠臣子孫詔

正郎告老可太常少卿致仕制

黃屋非堯心賦

春晚綠野秀詩

放五坊鷹犬詔

批答處士陳搏乞還舊山

小畜集卷二十六
吾研齋補金
日月光天德賦

四時和為玉燭詩

授節度使兼中書令西京留守麻

除右拾遺諸王府記室參軍

允邊上節度使入觀批答

崆峒山問道賦

五老化流星詩

授節度使左金吾衛上將軍制

誠諸王詔

賜漢南國王生辰金銀器

鄉老獻能書賦

鄉老之薦
登彼天府

古者選于里舉于鄉考德行而賓之以禮典賢能而獻之于王是故鄉老之薦不濫貢士之道有光豈不以教至教合要道察之于鄉黨升之于俊造合議于衆寡定謀于耆老非賢不舉在百行之孔修唯善是從非一鄉之皆好區以別矣尊而寵之察道藝而斯茂表公共而滅私予以振鄉大夫之職予以行鄉飲酒之儀厥時徹饗拜書以薦遂使乎賢者能者靡至于自媒自衛自才見舉固于我以何求在邦必詢所欲人之知勸既而有祿斯膺有位斯登嘉黃髮之上獻匪玄纁之下徵拜而受所以知樂善尊老義而舉所以見推賢讓能其進也若石之投水其類用也類木之從繩然後佞倖之風不起激勸之道自彼咸謂乎爾

公爾侯亦在乎我鄉我里學優則仕豈患人之弗知沒世
不稱唯曰士之深恥故得朝有多士野無遺賢以此取人
道合于遠古以此治世功侔乎上天乃鄉舉里選之謂信
朝行夕敷者焉我國家茂育羣材躋攀太古任賢克舉二
八闡化自齊于三五小臣待詔向金門願詣公車之府

宮漏出花遲詩

丹禁遲：漏深宮灼：花繁枝開正滿清韻出何賒靜拂
紅英密微穿翠葉斜依稀驚宿蝶冷落動晨鷄細逐香離
檻輕翻露滴沙願當直仙署鈴索共交加

雲州節度使加使相麻

門下臨戎閫外伏金鉞以專征定策幄中升玉堂而論道

眷惟重柄實在全才向匪得人固無虛授其有威稜却敵
勇毅安邊式旌善戰之功別舉疇庸之典乃求吉日特舉
徽章具官某劔恥一人城長里稟氣而全鍾太白論兵而
自著金韜爰自作翰雲中威行塞外倬彼廉頗之勇略居
然魏尚之英風念勞而閣列丹青已圖奇表効節而門開
朱白屢奏邊功宜升調鼎之資俾耀築臺之貴雖匈奴畏
憚已知域外之雷霆而黔首焦熬更作人間之霖雨詎云
優異姑示甄酬於戲位極人臣榮兼將相勿期驕而伐善
宜盡瘁于匪躬永保崇高何煩訓勵可依前件

搜訪唐末已來忠臣子孫詔

勅皇王之典道在賞延公侯之家義聞必復漢帝想二臣

之壠爰求近親元和念五代之孫詔還故宅朕祗膺駿命
景慕前王慮忠孝之臣僚有替陵之苗裔將行激勸宜示
甄收應唐末已來梁朝而下或直言于昏主奮不顧身或
立事于亂邦見危致命名姓雖存于青史子孫已混于白
丁流落閭閻湮沉門閤量器能之可用委長吏以上言庶
遵有後之文更勵為臣之節人或因冒國有刑章凡在守
臣副台深旨

正郎告老可太常少卿致仕制

勅具官某卧錦為郎懸車告老特舉賢優之典用旌知止
之心清資俾貳于奉常白首免嗟于郎署恩榮所及汝其
佩之可依前件

黃屋非堯心賦

黃屋車貴
非帝堯意

惟彼陶唐憂民道光處黃屋之非貴慮黔黎之弗康忘彼
乘輿示一人之勤儉思乎稼穡見百姓之平章不然又安
能禪位于大舜比崇于軒黃者哉豈不以天生蒸民樹之
司牧方誕敷于文德匪留心于華轂善行無迹我則期同
軌于萬方覆轍在前我則致可封于比屋蓋以樂為御德
為車欲躋民于仁壽將納國于華胥苟兆民之困矣雖萬
乘以馬如憂勞于四海九州未臻富庶願盼而鸞旗鳳蓋
終類蓬蔭有以見上德為心下民可畏唯惇獨以是念匪
崇高兮自貴遂使駟之響莫達于四聰慄之之心常咨
于庶彙自然我躬以瘠我民以肥但慮一夫而惕之焉知

四牡之駢：足可使域中之御朽乘乾因茲而取則天下
之車轍馬迹由是而知非所以道冠百王功齊五帝焦勞
之德固怠濬哲之風靡替耕田鑿井固何有於萬民神智
天仁自流芳于百世今我后功邁伯禹心侔十堯處越蓆
而古風斯振設土堦而儉德弥昭御六馬以競：常思罪
已通八蠻而穆：尚戒宣驕故得洪業弥芳玄穹降瑞念
蒼生而唯恐無告乘金輅而未嘗介意小臣待詔于公車
願比伊耆之故事

春晚綠野秀詩

雨過川原上凝眸送晚春韶光銷欲盡野色望來新天末
迷藍嶂江湄託麴塵垂揚難認影幽鷺莫藏身遠接天邊

幕晴和草展茵明時四郊靜凌亂踏青人

授六尚書節度使麻

門下國之喉舌尚書實總于六曹王之爪牙連帥出參于
十乘在昔唯求于藩屏我朝復藉于循良自非文武之全
才莫預邦家之慎選其有本由儒雅兼著韜鈴卻穀之禮
樂詩書義之府也仲尼之俎豆軍旅兼而有之宜分經國
之材各受殿邦之寄爰頒寵命式表殊恩具官某等或天
賦器能或時推謇諤揚歷盡試難之任周旋居求理之朝
騰驥而龍駕乾綱俱呈步驟雍穆而鳳吹律本共洽和平
暫筮調鼎之恩先授登壇之柄進賢剋而納言幘已峻朝
端伏黃鉞而擁白旄更光儒道仍加食菜式重分茅於戲

名器不可以假人是予所慎富貴弗期而驕至在爾孰思
勉承出將之榮勿辱知臣之鑒往踐厥位欽哉勗哉可依
前件

放五坊鷹犬詔

勅王者狩必以時除災害於黎庶射而登俎表孝薦于祖
宗過此以還盡為非禮朕祇膺大寶弗敢盤遊爰自國初
因其舊制五坊設畋獵之備四海貢鷹犬之儔雖則存而
勿論未如不作無益况又青骹黃耳耗民用以居多雨血
風毛匪朕心之所欲宜從式釋放式表憂勤應五坊鷹鷂
等並委本坊使即時放散所有狗犬人願收養為警備者
亦聽仍勅天下今後不得更進鷹犬庶使發狂之言遐遵

于老氏外荒之戒無愧于古書亦所以見朕惠及于飛走也告布中外稱朕意焉

批答處士陳搏乞還舊山表

所上表事具悉昔者帝堯臨于大寶許由稱之外臣雖居萬乘之尊不屈匹夫之志想彼貞節朕常嘉焉卿不仕王公多歷年歲雅有神仙之態蔚為高尚之人爰自近年屢云請見雖玉堂金闕暫喜于來朝岫幌雲關遽求于歸隱可認不羈之行用全獨善之心披閱奏章良多嘉尚所請宜依

日月光天賦德

陽景陰魄
光彼天德

日月焜煌麗乎天兮秉陽既垂光于率土實耀德于穹蒼

配行健之功；深煦育叶無私之道；契皇王是何鑿混
沌之精挂羲舒之影循環分晝夜之度盈縮通歲時之景
重輪重珥為當代之休祥行疾行遲是何人之馳騁但見
乎來徃天心舒陽慘陰浴咸池而杲；逗斜漢以沉；仰
之弥高自可侔于聖德無幽不燭固取象于君臨藹；晨
曦亭；夜魄覆盆雖隔于照燭圓蓋實資于輝赫運行不
息四時于是乎成功遐邇具瞻九土以之而光宅觀其日
之始也升若木拂扶桑光天德兮臨八荒龍吐熖而氛霾
蕩盡烏騰晶而魑魅潛藏于以瑞呈五色于以明列三光
月之始也出金天突瑤水光天德兮照千里兔奔而桂影
時搖蟾躍而露華輕委于以輾碧落而皎兮于以掩繁星

而嘒彼厥象昭然斯為得天附高明而能以蘓物彙以無
偏行中道而矐矐幾彰聖代逐左旋而出沒暗送流年我
國家道契貞明功齊剛克修五紀以叶用照萬邦而取則
夫如是叔寶之徒宜咏歌于帝德

四時和為玉燭詩

堯舜欽天日羲和正曆時銅渾列辰象玉燭照華夷真宰
潛能秉飛廉詎可吹祥光長赫矣佳號得溫其啣處非龍
首燃來豈鳳脂皇明方比盛鑑物自無私

授節度使兼中書令西京留守麻

門下周官重八柄之權掌之者方為崇顯洛食啓二都之
地分之者必在勳賢其有族茂山西功高天下畫像早圖

于麟閣分茅繼擁于龍旌將酬征伐之勞宜委居筭之地
具官某名標鐵券勇號翹人英雄而夜拜長星力扶輿運
慷慨而自稱大將誓立殊功爰膺推轂之榮累荷殿邦之
寄開白門而効死已靜邊烽按黑稍以揚威克申戎律加
以師貞之外理本尤精得士心而料敵無遺求民瘼而所
在稱理輯瑞而無違覲禮獻琛而頗見勤王尊周之大業
弥隆分陝之重權斯委仍相加右相式重大臣於戲舜號
納言周稱內史極爾人臣之位表予京邑之雄勉伸夾輔
之勞無忝崇高之命可依前件

除右拾遺諸王府記室參軍

勅朕藩屏家邦封崇子弟凡于王府必擇時才以爾具官

某文行素高才識兼茂俾為記室仍列諫垣庶令謇々之
臣體我親々之旨曳裾載筆爾其勉之可依前件

允邊上節度使入覲批答

勅某所上表事具悉卿心懸就日役在防秋屢拜封章堅
求朝謁載叙雲龍之會請離雞鹿之閑况聞刁斗無聲烽
煙罷警足可別雲中之巨鎮歸日下之長安慰予驚額之
思遂爾雁門之懇覽奏嘉尚再三不忘所請宜依

崆峒山問道賦

黃帝之道
天下清淨

愚嘗歷覽皇王嘉崆峒之所請見軒轅之道光咨有德之
人所謂乎不耻下問求無為之理寧辭乎陟彼高崗故得
化臻于冲寂功格于玄黃者也原其雲紀設官弦弧立制

蚩尤脩伏以聽命風后周旋而佐帝尚慮其至化未敷群
生未濟乃訪道于名山欲坐忘于浮世既而金根玉輅鳳
蓋鸞旗萬乘以之順動千官以之悅隨謁帝者之師吾將
學矣庶聖人之道可得聞之于是陳稽首之儀揖龐眉之
老方初筮以則告俄一言而悟道何思何慮靡煩手以乘
乾不識不知自垂衣于大寶喪天下于忽焉得環中于自
然既絕聖以棄智但牧民而御天姑射神山只在廟堂之
上華胥舊國不離樽俎之前徒觀其御彼六龍齊乎一馬
尚恭默之至道闡希夷之大化國風穆若克清壽域之中
物態熙然盡到春臺之下故得默彼聰明端居穆清罔象
之珠有耀出虛之樂無聲豈比夫舜舉八元方為求理堯

咨四子而後化成者哉我國家尚黃老之虛無削申商之法
令坐黃屋以無事降玄纁而外聘有以見萬國之風咸
歸乎清淨

五老化流星詩

五老知符命皤然共効靈遊河方告瑞入昴忽為星接武
傳歌詠翻身上杳冥來同聚并數去作種榆形鶴髮光難
認龍圖兆可聽至今依列宿高印遠天青

授節度使左金吾衛上將軍制

門下王者建侯行師取諸易象體國經野法彼天文外則
藩垣有伏鉞之權內則羽衛重執金之柄向非勲舊固與
僉諧其有盡節皇家策功清廟陟師壇而且久提禁旅以

攸直亦既得人乃頒成命具官某將門襲慶武曲儲精曹
景宗箭發餓鷁百里嵩世稱連虎當年誓志一萬戶之侯
封絕塞立功五十營之兵事考勲庸而進律分茅土以殿
邦克彰作翰之勞靡怠獻琛之禮一昨傾心象魏述職京
師載成魚水之懽宜授爪牙之任爾其戒嚴黃道警肅紫
垣致高枕于宸居是予繫賴法鈞陳于環衛在汝恪恭於
獻戲以上將之雄兼任宦之重世祖微時而健羨趙才沒
世以垂名勉繼前賢勿替休命可依前件

誠諸王詔

勅朕聞五帝官天下而禪讓于賢三王家天下而封樹其
子德已薄矣可不慎乎爾等生帝王之家承祖宗之慶各

踐王位且無軍功不知稼穡之艱難但受崇高之富貴宜
循禮法勿紊典彝凡爾所為必思有益朝謁之暇友悌為
娛以德以年雍穆汝或不子予敢獨親勉行忠孝之
風勿貽家國之念佩服丕訓無或忽諸

賜漢南國王生辰金銀器鞍馬詔

勅漢南國王星辰垂慶邦國有光咎陶感雲虎之祥克符
帝舜仲甫降嶽神之質爰佐姬周誕靈既在于茲晨錫命
宜遵于異數蓋松柏後凋之筭表君臣道合之恩與國同
休予所願也可賜卿金銀器物鞍馬等具如別錄

王黃州小畜集卷第二十六

開化圖書館
Kaifu Library

王黃州小畜集卷第二十七

擬試內制五題 凡四副

射宮選士賦

東風解凍詩

授御史大夫可司徒門下侍郎平章事制

恩賜宰臣一子可尚書水部員外制

除左拾遺直史館可開封府判官制

歸馬華山賦

王者無事
歸獸西岳

笙磬同音詩

節度使起復加雲麾將軍制

乞淮海國王乞落大元帥批答

皇清藏書

右諫議大夫可御史中丞制

賢人不家食賦賢國之寶

乾明節觀羣臣上壽觴詩

授翰林學士承旨可依前工部尚書平章事

制

奠故節度使文

宣示宰相臣已下復百官轉對御札

大合樂賦天地之禮

甘露降太一宮詩

賜天下脯五日詔

批答南詔國王請東封表

授藍田縣尉可右拾遺

射宮選士賦

稽夫古之射也觀容體試賢能建澤宮而洞啓萃貢士以
雲蒸選千里舉于鄉待時而動張其弓挾其矢揖讓而升
正鵠既設聲詩乃登有以知君臣之義洽有以見禮樂之
道興起不以行高于人藝推於衆與鄉老之薦充諸侯之
貢試其射也當仁而雖有所爭考以德焉合德而奚資偶
中徒觀其射法有程射樂有聲采繁之詩既作翹楚之技
斯呈非取其十發而九中在合于二節而五正必也射乎
蓋觀德而飾禮不失職矣由體正而心平是以大射之儀
既弦弧而剡木選士之義乃張侯而設鵠九賓既序二耦

為屬于以定隆殺于以分榮辱與於祭者所以昭乎寵光
削其地者所以行乎誠勗是故五等相參罔遺之子男多
士至止必命之鄉里其中也得為主賓其爭也是謂君子
取于德而不尚力非躡甲而射之求諸已而不反于身乃
審固而中矣是謂繹志孰云主皮煥乎得矍相之義洋然
有闕里之儀所謂禮無違者故得人皆仰之士有遊六藝
之場抱四方之志雖中鵠而有立尚屠龍而為事將射策
于金門別取穿楊之利

東風解凍詩

習：氣初通峨：勢自融
淥波歸舊水寒片漾和風暖想
千溪綻吹疑一夜空鷺翹休映白魚躍乍翻紅
繒裂方塘

上瓊流巨壑中猗漣還浩渺瀕賴濟川功

授御史大夫可司徒門下侍郎平章事制

門下坐霜臺而司臺憲振肅王綱踐黃閣以持衡緝熙帝
載眷惟重柄允屬純臣其有首冠鴛行位崇烏府弄印之
名已著和羹之命爰行具官某堯殿神羊舜庭威鳳五色
燦脩補天之石四方觀測景之圭儼威容而青女司霜薦
祥瑞而黃人守日爰自位尊亞相道切致君挺屈軼以當
軒雖能指佞艤艗而在岸宜命濟川趙堯已振于威稜
邴吉佇觀于調燮式耀三台之位仍加五教之資固敢汝
私蓋從師錫於戲君之命相唯過失之是求相之愛君唯
公忠是舉勿拂人欲勿依予違躋富壽而和陰陽寔有望

于汝也往欽哉可依前件

恩賜宰臣一子可尚書水部員外郎制

勅公共無獨親之義帝皇有延世之恩爰舉舊章時覃慶澤惟爾嚴父為予大臣嘉其調鼎之功命及趨庭之子俾升華省仍列清曹乃含雞舌之香式耀鳳毛之貴嘻古人有垂白即署者爾起家居之榮亦至矣慎守太君之命免譏世祿之家負薪堂勿忘古訓可依前件

除左拾遺直史館可開封府判官制

勅朕命大臣尹茲京輔厥惟佐職必慎其人以爾具官某位列諫官職兼史氏俾就難試之任式彰不器之才乃自諫垣倅于天府裨贊之道爾其勗哉可依前件

歸馬華山賦

王者無事
歸獸西岳

聖人以文德昭彰放我馬兮功齊武王望三峰而縱逸見
萬騎以騰驤噴雪眠沙罷飲長城之窟嘶風齧草咸歸華
嶽之陽當其鎔鑄五兵蕩平九野舜朱干以在上振木鐸
而化下于以來遠人于以却走馬塞垣既靜何為夙駕之
虞國步方清莫有生郊之者所以散屈產之乘解渥洼之
駒嘶北風而何益患南牧以應無朔吹生時免聽隴頭之
水秋霜落處寧嘶關上之榆已而汗血休墜蘭筋不匱出
皂棧以弄影入青山而解轡芙蓉峰畔爭翻歷塊之蹤邏
迹城邊詎見防秋之事是何驕：駢：星分電飛十二就
之華纓不御五千仞之翠嶺如歸過岫幌以長鳴乍來天

廐出雲關而互躍似突兵圍永別戎車長隨野獸玄黃之
 病何有赭白之紋自瘦既無取于代勞亦奚資于禦寇空
 疑旌旆映片之朝霞更誤錫鑿響冷之山溜寧載驅
 而載馳任自東而自西散亂浮雲之景奔騰逐日之蹄詔
 巨靈于按轡想石鼓于聞聲免隨棹鞅之人揚塵紫塞非
 有敝帷之費朽骨青溪美矣夫帝道方行王師既鑠取威
 固在于凶器耀德唯矜于朽索有以見太平之業兮邁前
 王可登封于泰岳

笙磬同音詩

鼓簧名本異拊石意何同吹擊雖殊致聲音忽暗通誰將
 嶰谷韻潛合泗濱風莫問補天王休尋入海工鳳鳴應不

辨獸舞自難窮古樂何人會須知政在中

節度使起復加雲麾將軍制

門下三年之喪萬古通制雖人子盡苴麻之禮而將軍有
金革之文方資禦侮之功爰舉奪情之典其有土茅作翰
風樹成悲舊章雖聽于終喪優詔宜從于順變具官某垂
天迅翼躍冶祥金當時命未來鴻鵠曾嗟于壠上洎風雲
得便蛟龍不在于池中勇爵素高懋官斯至築韓壇而嶽
立持漢節以風行旌旄方慶于趨庭荼蓼俄悲于陟屺已
過絕漿之日難終泣血之期是宜降丹詔以推恩許墨纒
而從事仍加爵秩式表哀榮於戲執戈衛社者惟臣之忠
立身揚名孝惟子之孝將顯父母勿忘君親勉樹勲庸無

黍光寵可依前件

允淮海國王乞落大元帥批答

勅淮海國王所上表事具悉惟王奄有全吳世尊中夏齊封呂尚得專諸侯之尊征魯祭周公宜用天王之禮一心奉上五世其昌爰歸京師且獻圖籍乃疏王爵兼領元戎匪示等威蓋旌夾輔王知止不殆謙尊而光既避位以拜章可優賢而下詔旌乃賢明之德均其勞逸之心聽解重權表台深旨所請宜依

右諫議大夫可御史中丞制

勅漢制大司空之下有中執法之臣蓋周官少宰之任也彈奏弗法賢不居以爾具官某昌言有聞直道自任宜從

諫署擢在憲臺且命爾專道而行專席而坐舉劾糾禁無
曠厥官可依前件

賢人不家食賦

賢國之寶
家食生吝

聖人以好爵斯懸養萬物兮法上天朝有代耕之祿世無
家食之賢含糗羹藜休隱文衡門之下重茵列鼎爭趨魏
闕之前豈不以養正豐財求賢輔國既審像于傳築亦明
揚于舜側馳束帛以雲委揭干旄而杓直寂而永辭顏
巷誰復曲肱憧而盡赴堯庭自期陳力遂得四門穆
百僚師蓋知乎觀所養也匪謂乎飢者食之考其才而
受其祿象于豐而取于熙固敢素餐盡蹇而無隱厥惟
退食必透而有儀是知食乃人天賢為國寶克勤乎待

士之禮允叶乎養民之道法吐哺以興周笑飲酒之在鎬
當年漢殿猶聞索米之言今日商山不見採薇之老自然
人爵無君庖有加借筋競陳于籌畫漱流休卧于烟霞不
僭不奢豈効何曾之室載飢載渴免同原憲之家得非畝
有餘糧人無艱食君以祿兮御下賢以才兮舉職則知進
之人欲鑿杯而莫得向使民起菜色時沉頌聲君築臺兮
避債臣採槽兮偷生則識時之士雖竊祿以非榮方今三
時不害百度惟貞夢到華胥高枕而寧勞肝食民躋富壽
還淳而盡飲和羹士有併食儒宮成功文陣入官未免于
五斗探學徒窺于數仞將期食乎鼎食鳴鍾寧虞徃吝

乾明節觀群臣上壽觴詩

甲觀正儲祥羣臣獻壽觴捧登金殿穩深照赭袍光環佩
和仙樂衣冠惹御香玄天共悠久碧海比靈長葵藿心無
異鴛鴻翅有行何當隨近侍同此祝無疆

授翰林學士承旨可依前工部尚書平章事制
門下天道無為運五行而亨品物聖人有作設四輔以泰
蒸民方隆大寶之基宜擇具瞻之位其有老于文學以事
絲綸貢昌言于顧問之間變古道于典謨之際宜從禁苑
擢在台司庶符命說之篇致展致堯之術具官某尼丘孕
質昴宿垂精驥有德而可稱鳳非時而不下爰自優游丹
禁輝映皇家驅三代之文章雲蒸筆下慎一人之禁密鸚
立朝端諫畋獵以上書請登封而作頌步鰲頭而且久歷

雞樹以攸宜未離喉舌之資更受腹心之寄沙堤金印別
光東閣之榮鈴索花磚罷赴北門之召極人臣之位資王
佐之才勉思啓沃之謨勿忝崇高之任於戲予為元首汝
乃股肱推公共以為心弗私名器事弼諧之茂業用乂邦
家誠之勗之期太平之可致也可依前件

奠故節度使文

故某鎮節度使權重分茅功深衛社塞垣無患累朝而恃
彼長城天道難忱一朝而斷乎右臂收淚對丹青之像含
酸聽鞀鼓之聲特命中牢往羞烈魄表君臣之大義俾存
沒以知恩魂且有知察台深意

宣示宰臣已下復百官轉對御札

朕聞古之王者樹謗木懸諫鞶所以求已之過失也季代以還斯道云廢七人諫諍之位徒有其名百官轉對之儀稍為近于古誠為有益是謂彛章亦既寢之甚無謂也蓋以因緣兵革頽靡紀綱在下者希旨而依違莫陳利病居上者飾非而拒諫空歎覆亡朕嗣守鴻圖躬親庶政將欲立無過之地行不諱之風凡爾立朝宜遵舊典俾嘉言之罔伏仍擇善而是從仍付有司悉依故事宰臣庶位申朕意焉

大合樂賦

天地之禮
張樂雍美

王者作樂崇德因高事天固大合之奏也陽至音于自然本乎人心風俗以之而變矣考諸古道神祇于是而降焉

豈不以大樂之制聖人能事于以導淳和之氣于以窒嗜
欲之志必使律呂克諧宮商有次絕靡之邪聲表情
于大義以此感人而人悅以此薦神而神至其用也非八
蜡以六宗其大也必父天而母地見德音之孔昭信同和
而有自又何止百獸率舞丹鳳來儀亦將動孝思于嚴配
揚和樂于華夷綴如繹如所謂樂之大者載考載拊神其
聽之徒觀其儀濟：大合之樂兮發而中禮于以用之兮
配至誠于祖禰其聲洋：大合之樂兮發而有章于以用
之兮表至德于皇王匪但崇牙設猛簠張金石間作于戚
成行然後稱為雅樂哉議夫樂之設也非管非籥樂之用
也唯淳朴若非審音以知政安能制禮而作樂聽之忘味

佞邪之道弗興和而不淫廉正之風有覺是以大合之樂
其樂雍：用之于圓丘方澤施之于除禫登封豈鐘鼓云
乎姑悅人之耳目異鏗鏘而已失盛德之形容我國家韶
護登歌咸英盡美復夔樂于雅正黜鄭聲于滛蕩自然天
地効靈耿休光于大祀

甘露降太一宮詩

甘露霽長空垂休太一宮瑞光經日在聖德與天通如醴
沾衣白凝脂間紅葉淋漓滴滴層漢願盼駭重腫五色名難
比三危味莫同祇應書信史千古仰玄功

賜天下醕五日詔

勅古者禁諸羣飲所以節用而豐財賜以大醕所以布德

而施惠禁之或慢則糜穀滋多賜之不行則屯膏是歎稽
乎歷代寔曰彝章自唐室亂罹中原多事廢茲恩惠積有
歲年朕負荷丕圖躬親庶政唯思旰食弗敢酒荒幸以宗
廟降靈乾坤垂祐屬方隅之無事思黎庶以同懽特隆五
日之醑式表一人之意可賜天下大醑五日仍令所在官
給酒食

批答南詔國王請東封表

勅南詔國王某所上表事具悉卿勤王歲久望闕情深特
推北拱之心遠有東封之請嘉賞之外愧恥良多朕聞封
禪之儀皇王大禮苟非功格天地澤被昆虫雖力行于一
時終取笑于千古矧在涼德敢誣介丘况燕土未平河流

屢決中夏之俗罹于羗戎多稼之田墾于水潦一念至此
洞燠乃心而又鄣黍江茅東鷄西鵠未之有也泰山梁甫
匪予意焉卿當善育民人謹奉正朔登封之請以俟治平
誕布朕心固宜知悉所請宜不允

授藍田縣尉可右拾遺

勅王畿釋褐諫署曳裾清要之資非才不授以爾具官某
以文學登第以廉平効官特從侍從之班副我窺規之意
望朝有遺政爾其拾焉勿虛諫垣以忝休命可依前件

王黃州小畜集卷第二十七

小書集卷三

一

石齋補金

開化圖書館
Kaikwa Library

王黃州小畜集卷第二十八

碑誌

右衛上將軍贈侍中宋公神道碑奉勅撰

前普州刺史康公預神道碑

宣徽南院使鎮州都部署郭公墓誌銘

諫議大夫臧公墓誌銘

故侍御史累贈太子少師李公墓誌銘

右衛上將軍贈侍中宋公神道碑奉撰勅并序

皇帝冕而躬耕之明年端揆紀號之二祀夏五月戊戌上
將軍邢國公薨開寶皇后之父也于後唐為外孫于漢室
為駙馬上聞之震悼有詔輟視朝一日贈侍中崇威里也

嗣子銜恤上章請刻石于神道事下相府俾西掖掌誥之
臣考其實而文之于是詳求家諜參用國史論次功行直
而叙云臣聞仲尼修春秋載王姬之築館于長述史記列
外戚之世家詩稱下嫁于諸侯傳云納女于天子內所以
敦睦九族外所以協和萬邦因副馬以紀官著濯龍之通
籍其來尚矣可得言焉然而或禍敗自貽或賤微為累張
敖漢祖之子壻孝惠之后父親則親矣而貫高之讐生焉
衛青平陽之所天子夫之愛弟貴則貴矣而鄭季之出恥
焉加以器盈則覆位不期驕呂祿以后族而封王北軍共
擊班勇以父功而尚主東市被刑簡冊具在驕矜可誡則
有世開魯館家襲韓壇享必復之公侯荷必大之門戶長

守富貴無忝祖宗兼將相之崇高居后妃之親族殊勲懿
行溢美于青編善始令終騰勞于明代惟我故廣平宋公
之謂乎公諱儼字仲儉世居廣平號為著姓公以生于西
都今為洛陽人也其先微子啓以帝乙長子商受庶兄言
不用以歸周國既亡而封宋盛德不泯列于三仁垂裕下
延遂參五伯繇三辰歷世有其人遠則昌居代邸對周勃
以責公言近則璟立唐朝並姚崇而行直道至公家族門
閥益光累贈太子太師追封莒國公諱儼道追封莒國太
夫人李氏大王父母也天德軍節度使開府儀同三司檢
校太師兼中書令贈尚書令追封衛國公諱瑤追封衛國
太夫人朱氏王父母也光祿大夫檢校司徒房州刺史累

贈太師諱延浩後唐義寧長公主追封楚國太夫人考妣也皆積功累行克致高門翼子謀孫遂鍾餘慶先是晉天福初房州太師用二千石為汜水關使張從賓之叛也力戰死之公即房州太師之長子也方居幼學爰喪父天晉高祖以公死政之孤貴主之子存恤撫養俟其成人乃補殿直俾奉朝謁尋遷供奉官時天福三年也重以晉祖常事莊宗有舊君之禮每貴主入見聽其不拜時兵戎方熾經費不充惟公之家賜與甚厚盡而復取亦無倦色一旦晉祖從容謂貴主曰朕于主家無所愛惜但朝廷多事府庫甚盈虛主所知矣今輦轂之下桂玉為憂可命偃分司西京以豐就養因厚遣之且勅筭司具晨昏伏臘之用至

於醯醢率有備焉既而漢高祖為侍衛軍朝望攸重以公
名家子又後唐之出也且風骨俊秀異乎諸孤欲以女妻
之乃命長子承訓奉書于貴主且先以襲衣名馬遺焉承
訓即漢之開封尹魏王也公與貴主拒而弗納漢祖又勅
其子曰宋氏不諧勿復見我矣貴主知志不可奪遂許之
及漢祖出為北京留守表公偕行因補衙內都虞候七年
漢祖使公修朝貢之禮：成而退恩寵有加特授銀青光
祿大夫檢校右散騎常侍兼御史大夫上騎都尉充北京
武德副使少主嗣位改北京皇城使尋遷檢校刑部尚書
輕車都尉時開運元年也三檢校尚書右僕射上輕車都
尉俄屬疆場失守戎虜亂華漢祖首建義旗遂成大業睦

姻行慶公實首焉授金紫光祿大夫檢校司徒守右金吾
衛大將軍兼御史大夫上柱國廣平縣開國男食邑三百
戶駙馬都尉世祖微時常羨執金之仕魏朝納壻但求傳
粉之容兼而有之斯足貴矣時漢氏雖建大號猶用晉祖
之正朔即天福十二年四月也九月加光祿大夫檢校太
傅行右金吾衛大將軍充街使進封開國伯增食邑四百
戶賜開國奉聖功臣既而改紀年之號覃在宥之恩矧茲
勲戚之家固被便藩之澤乾祐元年加特進開國侯增食
邑三百戶少主之嗣統也在諒闇之中念藩垣之重乃以
斧鉞授于親賢授檢校太尉使持節利州諸軍事行利州
刺史充昭武軍節度使利巴集等州觀察處置等使進封

開國公增食邑五百戶實封二百戶改賜開國奉聖保定
功臣嘉州異俗綿谷舊封素推設險之邦遙仗建侯之利
位兼掌武不亦優乎二年十月出鎮滑州增食五百戶實
封二百戶外韋舊都虛昌古郡貞莊師律初登南鄭之壇
藩翰王畿實主北門之管年猶未冠議者榮之無何將相
分權君臣道失周祖出潛淵而或躍知寶命之在躬勩黎
之功已謫于西伯升陬之衆遂指于南巢公動識幾微深
明禍福以為不周已折建一指以難扶大寶有歸順三靈
之改卜周室肇基慶澤首被徽章廣順元年增食邑一千
戶實封三百戶改賜推誠奉義翊戴功臣三年春丁楚國
太夫人憂哀毀過禮親族憫之服闋授左監門衛上將軍

增食邑五百戶實封二百戶禮卒通喪恩隆近侍周廬有
次環闔闔以無虞羽衛載嚴致華胥之甘寢世宗之伐淮
夷也公實從焉授右武軍統軍壽州行營副部署兼右廂
排陣使屬王師漸老戎輅再征江南大率舟師次于東泖
洲下斷我蘇杭之路也世宗遣公率戰艦數百艘以襲之
且命襄帥慕容延釗領輕騎登陸而進與賊遇于江中合
勢大戰盡破之時世宗蒙犯矢石跋履山川多為野廬以
駐行闕忽有猛虎近于乘輿公引滿注之一發而斃叛命
之邦既摧枯而拉朽啞人之獸復食肉而寢皮豈比乎樓
船將軍徒驚矜水獸射聲校尉但署虛名而已哉既而劉
瞻委城納款李景割地稱臣班師旌淮甸之功議賞復滑

臺之命五年五月授義成軍節度使其制略曰長驅下瀨
之師若涉無人之境夷寇戡難爾既立于殊庸礪岳盟河
予豈忘于豐報云南燕舊邦北闕孔邇河壖作翰遙臨白
馬之津穰下統戎即鎮卧龍之地十二月移鄧州武勝軍
節度使六年世宗以焦勞厭代恭帝以冲幼承祧方賴勳
臣爰崇異數授開府儀同三儀司增食邑五百戶實封二
百戶我太祖神德皇帝象叶太階功高大麓顧命雖同于
伊霍謳謠不在於丹雘樂推而逼乃民心揖讓而授茲神
器惟新布德命方隆萬世之基念舊推恩乃冠三師之秩
建隆元年授檢校太師增食邑五百戶實封二百戶于時
李重進凶狡無厭跋扈有狀公明惟先見志在奪謀飛章

述其包藏密旨委以經畧故有通州巡警之役焉既絕南
奔之路遂下東平之詔重進奸謀果發王命不行太祖親
御六師直抵孤壘以公為揚州行營排陣使列牧野之車
徒法常山之首尾師方因壘城以復隍格苗不待于七旬
圍蔡止勞于九日蕩乎克豎公有力焉飲至之晨首膺茂
渥七月授廬州保信軍節度使增食邑五百戶寔封二百
戶旌戰功也合肥重鎮巢國古城雖張遼守藩克清淮國
海而子牟戀闕終捨江湖四年夏十乘來朝三峰改鎮授
華州鎮國軍節度使鄭桓咸林之地素號豐饒晉侯河外
之田舊推形勝三輔既資于鎮撫雙旌更遂于優游國家
展禮園丘推恩羣后錫之懿號疇以井田乾德元年增食

邑五百戶實封二百戶改賜推忠宣力保義功臣是歲
太祖以坤道闕儀中宮虛位以公之世有行義可以合禮
文以后之天資法相可以當人主初求輔佐遂上宮闈沙
麓休徵果叶母儀之貴睢鳩雅興聿興王化之基亦何必
射孔雀以設奇鑄金人而語怪然後稱其神異哉既列外
姻乃移近甸五年授許州忠武軍節使度開寶元年增食
邑一千戶實封四百戶改賜推誠宣力同德保義功臣假
鄭伯之田時惟重地加紀侯之爵盖有前聞授邠州靜難
軍節度加押蕃落等使指公劉之舊壤位重十連異魏冉
之出關從車千乘四年冬以郊禮霈澤加食邑一千戶實
封四百戶八年冬平東吳之列國九年夏幸西洛以告成

乃睠庶邦咸均井賦增食邑一千戶實封四百戶俄而
太祖以南巡狩蒼梧奄逼上仙之數東園畫梓遂纏同軌
之哀我應運統天睿文英武大聖至明廣孝皇帝飛龍在
御元龜告符大橫旗、叶重熙于棠棣小心翼、賚允澤
于蓼蕭公奕世將門先朝內戚專征授命已持闔外之節
旄爰立登庸更作人間之霖雨授同中書門下平章事公
既荷寵章乃修觀禮輯瑞有光于文陛建牙復命于名藩
二年冬授同州定國軍節度使內史舊甸長春古宮澤湧
若泉昔謂豐年之地草連沙苑斯為牧馬之郊殿我大邦
實惟舊德三年冬皇上初陟泰壇大崇方岳增食邑一千
戶實封四百戶洎我后太平并寇親御戎衣公以扈從之

勞享疇庸之典四年冬增井賦真食如三年之數越明年
胡人犯塞法駕親征隨行在于鄴都委邊事于國都橫海
以公知滄州軍州事擁左馮之旌旆臨滄水之封陞委注
方隆威望愈重尋以邊封罷警朝命就藩六年冬上祀昊
穹再陳柴燎爵邑之等率有異焉封邢國公并賦真食如
乾德元年之數九年六月奉詔歸朝登于禁衛居中制外
爰陞拱極之班以逸代勞亦示優賢之禮出入之重又何
加焉授右衛上將軍雍熙元年冬增食邑五百戶郊天之
澤也三年詔以本官知霸州軍州事未幾徵歸荐居環衛
皇上方耕春藉復益邑田加食邑如雍熙元年之數是歲
公再受命兼判左右金吾街仗事緹綺二百尅靜神州金

門九重遂成高枕徼巡無怠儀位有光方將起灞陵夜獵
之娛赴翰海防秋之役而後宮親屬終以次于闔章絕塞
功名遂不侔于竇憲齒髮尚暮寒暄薦瘥中使御醫旁于
于道寢于北牖欲二豎之為袂升自東呼遂三呼而不呼
復享年六十有四即以其年冬十有一月二十五日葬于
河南縣龍門鄉宮南里從房州太師之塋禮也詔以中使
護其喪事先夫人劉氏晉天福中封彭城縣君開運中進
封郡君皆從夫人之貴也漢祖開國封永寧公主少主乾
祐中進封秦國長公主周顯德中改封彭城郡夫人尋進
封京兆郡夫人公之將葬也開寶皇后泣血上言請加褒
贈特詔追封曹國夫人非常典也惟夫人素稟肅雍早從

隆降雖穠華已謝而蕙問長存天陰本高不繫夫而命爵
母道克脩寧為子以求即用能符夢月之嘉祥誕配乾之
陰教新野封君之號雖漏典彝文靈園邑之儀更光泉壤
繼室以隴西李氏故保大軍節度使洪義之女也開寶中
封隴西郡夫人先公而亡象服是宜永歸同穴今夫人彭
城劉氏故左省常侍悅之女也大平興國中封莒國夫人
栢舟自誓常欲未士有子十人長曰元吉終于西頭供奉
官次曰元振終于幽州節院使次曰元靖西京作坊副使
次曰元規前同州子城使次曰元度前同州親事都頭次
曰元方終于同州山河使次曰元載元翰俱未任一子幼
而未名皆早聞詩禮不墮箕裘萬石君之子孫世推朴謹

竇太后之兄弟人言退讓承家幹蠱未易可量女十五人
開寶皇后即其長也次適崇儀使韓崇訓封廣平縣君其
次未嫁而亡次適西頭供奉官郭守能次二女皆早亡次
適孟隆諡即右龍武衛統軍玄喆之子也次適曹守讓即
左驍衛上將軍判金吾街仗事翰之子也次適西頭供奉
官高處榮即故渤海王懷德之子也次適董嗣顯即故通
遠軍遵誨之子也次為比丘尼法名惠圓餘皆幼夭母弟
三人故宮苑使延業即其仲也今莊宅使益州內外都巡
檢煦即其叔也叔氏有子元輿進士第補祕書省著作郎
直史館秀而不實今也則亡故許州衙內都虞候延積即
其季也其子女兄弟猶子令孫殆三十餘人譜牒備存

此不復載或鶚立周行或蟬聯甲族畢萬之家既盛固有
本根陳完之後其昌可知光大惟益部巡檢出自將家雅
好儒術雄材偉度朝論多之惟公生積德之華宗居累朝
之懿戚富而好禮貴而不驕始以勲德之家特膺選尚終
兼廟堂之位遂極人臣功臣享八字之褒封食疏萬家之
賦至于姬公太師之任黃權開府之資上柱國漢之寵官
上將軍漢之重柄位列亞相爵為國公再居金吾再處環
尹家出帝后室惟貴主藩籬八鎮周旋四紀有戰功以書
史有世祿以傳家列振々之子孫啓渠々之夏屋出則建
崇牙開大幕有瑠戈玄甲之徒奔走于戲下有影纓結佩
之士羅列于初筵入則挺介圭峨武弁有形弓湛露之樂

燕饗于公朝有乘車文馬之賜勞来于私等家祭五廟陳樽彝分器之數食具萬錢得鳴鍾列鼎之盛而年将耳順命以考終人無間然可謂達矣昔人云躍馬肉食者四十三歲器何小哉前史稱朱輪華轂者二十三人禍亦大矣始終無悔公實有焉宜乎刊勒豐碑光表幽宅俾我休烈與宋無疆者矣臣掖垣備位論譔非工受明命之已行率諛聞而塞職五月而葬素車方會于同盟百代可知樂石願垂于不朽銘曰

天地之道曰剛與柔后妃之德在河之洲媯汭釐降塗山好述乃睦九族乃親諸侯大國之援外戚之助史不云乎列侯尚主詩不云乎大邦有女夫婦以正國家以固日中

則移月滿則虧富祿后族人得詠之梁冀外家鬼其餒而
簡冊具載居高必危休哉宋公勲戚累世唐之外孫漢之
主壻乃生聖后作配先帝富貴崇高光華譜系維公之始
生于紈綺晉主撫之同乎已子漢皇妻之實為知己曾未
弱冠剖符千里維公之中深用變通歆冠環衛虎帳臨戎
壽春維揚寔有軍功連移巨鎮克振英風維公之終我朝
懿戚為將為相以年以德罷殿侯邦乃尹環極能執干戈
以衛社稷嗚呼勲賢弗登大年薨于路寢像列甘泉恩隆
賻贈寵閔貂蟬邊功未輯遺恨依然其誰祔之永寧園邑
昔也築館秦樓岳立王姬之車星繁霧集今也同穴沁園
兩泣貴主之墳烟愁露濕其誰哭之開寶宮中昔也歸寧

車服有容爛其盈門姪娣以從今也哀凶怙恃弗終號天
罔極鞠育何功乃會同盟乃先遠日丹旒悠々佳城鬱々
薤露淒咽松阡蕭瑟萬古蕭瑟萬古龍門豐碑屹屹

前普州刺史康公預撰神道碑

立功名之謂賢齊得失之謂道悟生死之謂達三者有一
則可為聞人矣况兼之乎其誰則然吾見于康公矣公諱
延澤字潤之代北人也其先蓋夏后氏之苗裔曰淳維世
有北土自立君長其別處康居者即始祖也西漢時康居
國王納質于大單于其後單于內附遂有雲中以國為姓
曾祖嗣皇任蔚州蕃漢部知兵馬使累贈太子太師祖諱
公政皇任代州都知兵馬使累贈大傅考諱某皇任河中

節度使檢校太尉兼侍中贈太師謚曰武安公其世祿世
功載在武安碑此不復書公即太師之次子母衛國夫人
高氏晉氏晉天福中起家補東頭供奉官歷漢逮周垂二
十載艱難險阻靡不脩嘗以功轉染院副使我太祖神德
皇帝之開國也以荆湘未下詔宣徽南院使李處筠襄帥
慕容延釗出偏師南討而公實從焉時江陵高保融死朝
議以其子繼冲權領軍府因命公齎璽書乘駟騎以吊撫
焉且觀便宜二帥留襄陽以待之公宣諭而迴盡得機事
前導師旅長驅而南平定荆湘易于拾芥尋轉染院使監
護荆南軍賞功也乾德中受代歸朝會國家有平蜀之後
詔公為北路前軍都監至固鎮主將王全斌請公領前軍

先入以張萬友佐馬尋擊白水閣子二寨破之勒兵會乾
渠渡下蜀人恃險出萬仞寨以待王師以公與萬友選死
士百人先登水西寨以兵繼之縱火燔燒柵木俱盡遂取
之明日全斌中軍方至乃合逼置口走之遂下興州與夔
峽兵合進擊西縣三泉生獲偽興元節度使韓保負公皆
有力焉由是乘勝討遂越大小漫天累戰皆獲赴利州夜
半拔之蜀人由桔栢江以遁乃燒浮橋保劔門恃天險也
諸將方議進擊會有蜀卒來降自言知山川道路且告曰
自益光江東有路曰來蕪直抵劔門南二十里蜀人設寨
以阨之此捷徑也于是全斌欲自來蕪路入諸將莫有言
者公曰來蘇小路無煩主將可使偏裨以副大將親叩劔

門劔門精兵所聚也且蜀人聞來蘇軍入必分兵以禦我
此必克之勢也乃命公與史延德往焉公曰書稱後我后
後來其蘓今路名來蘓天啓吊伐之義也遂捨車馬披榛
梗而蜀帥王昭遠趙崇韜果弼小將守劔門引軍于青強
店下由是全斌克劔門獲趙王二帥席卷而西矣時蜀世
子玄喆統銳兵守綿州聞劔關不守乃棄城而去蜀主遂
令伊審微奉表歸順全斌因請公以一百騎先入成都安
撫軍民且伺必降之意是時蜀國餘兵尚有七萬公往也
人情危之公既至以二十騎自衛入見蜀主諭以禍福示
以恩信蜀之君臣舞蹈感悅筵三日盡封府庫齎魚鱗而
還全斌等遂平蜀國遣蜀主歸于京師詔公為成都府兵

馬都監而蜀軍復亂且以全師雄為首所在殺知州通判
以應普州劉澤遂州王可寮果州宋德並授師雄偽署朝
廷以公為普州刺史公詣全斌請衛兵赴理所與公四十
人公發成都至簡州招敗亡之士得刀手一千人取器甲
以給之乃教戰陣立部伍擁之而去至郡境有賊甲離領
衆五千來犯公一戰敗之擒七百人授偽命者立斬一百
輩餘皆釋之乃懸榜示人諭以逆順招集團結得刀手三
千人敗劉澤三萬人自是賊勢稍沮公雖至普州靡宇盡
為煨燼乃依山設屋權駐師徒而兵亂之餘無食可守公
披攘群盜且戰且行直至遂州輦運儲蓄以至成城畚揷
靡不具焉既而王可寮等數郡賊兵合勢來戰公又敗之

遂至合州赴江溺死者不可勝紀未半年普遂資簡昌合
等六州飛奏以聞優詔褒美且命與曹琛充東川七州招
安巡檢使仍賜錢帛委公等隨軍賞給自全師雄亂後東
路艱難賊害使臣抄掠琛贐者多矣時師雄雖死賊衆尚
有萬人立謝行本為主以羅七君等佐佑之聞公警巡望
風而遁遂以賊衆保于金堂非公所部也公及越境以討
之賊衆又遁因駐師以待焉卒平狂寇先是金堂新都洛
縣等民為賊逼脅皆餉饋資給之公則出令招誘許以自
新約旬不來無少長皆殺民歸者萬餘戶咸得安堵輸稅
縣官故民心有懷賊黨自潰加以全斌等同心經畧兩川
悉平及奉詔班師主將獲罪皆以殺降民兵受蜀賂故也

黜公為唐州教練使天下人為公惋歎公處之自若不出
怨言惟築室墾田聚書訓子而已十年間闢草萊植桑柘
居泌水之上遂為富家：到于今賴之開寶末太祖幸西
洛祀南郊始起公為供奉官弼監左藏庫今上即位就除
左藏庫副使兼水北皇城大內巡檢又召公為東京畿內
都巡檢使俄而公之猶子六人皆恣用家財不事生產公
以禮義勗之反生怨懟乃搥登聞鼓願析祖業以自給詔
公以理處割事未定會靈昌河決公受詔塞之諸子復訴
公違詔遂罷使職退居洛陽不數年向之猶子已飢寒于
道路矣上躬耕之歲公會恩例當起權河南尹許仲宣頗
相勸激公曰三代為將道家所忌吾自蔚州太師而下世

傳將帥今幸功名以繼祖禰年享壽考運逢理平使子孫
去橐鞬襲縫掖熙々自樂以終天年吾願足矣吾嘗讀李
廣傳見其兵敗削為庶人幸匈奴犯邊被召而起及軍吏
責薄自刎帳下欲望灞陵夜獵其可得乎古人成敗取則
不遠以老疾為辭而奏其二子焉淳化三年公七十六矣
一旦謂其子懷珪曰吾衰老若此死在朝夕苟以先太師
之靈得保首領以沒于地吾無恨然吾有平蜀微功思預
刻吾墓其誰能之吾聞商山王副使舊直紫薇有文稱于
代又嘗任長洲宰時汝為姑蘓從事亦同僚也試為我請
焉懷珪曰預凶事非禮也且心所不忍公曰此人子之大
情名教之舊制也吾則不然且古之達者以生為寄以死

為歸今吾官歷二千石年踰七十六吾不死而安歸吾欲
生前自視其文知詞無愧而功不誣也懷珪不得已命其
子齎書而來某據事狀次而書之大率平蜀之功公居第
一離而辯之其功有五若先入蜀境擊白水閣子二寨開
王師破竹之勢其功一也徑赴來蘓分蜀人青強之力使
劍門勢解其功二也以二十騎入見蜀主其功三也以四
十人定普州其功四也越所部擒羅七君其功五也至于
謨議機權賞罰威戮所不盡者有公之自著平蜀實錄在
焉初全師雄之亂也諸將議殺降兵二萬七千人恐為內
應公獨請擇老幼疾病者七千人釋之然後起二萬人以
十人為率皆反接之若連雞貫魚桴江而下以兵衛之比

賊衆知之可二百里矣若寇來劫奪殺之于江如此則殺有名矣雖不見用可謂仁乎後國家議罪果以殺降為名有先見之明不免于戾者命矣夫公形貌魁傑知謀宏遠剛而有變勇而能仁負將材喜兵法雖為王公之子恥以恩澤封侯故能立功于當年齊得失以知命悟生死而無懼雖古之名將世之達人何以過此與夫伏劍而悔降兵仰藥而罪地脉者不亦賢乎公始娶安氏蔚州別駕某之女也先公而亡男五人長懷玉進士不第早亡次懷珪前平江軍節度推官試大理司直次懷理以侍親幹家未聽入仕次懷璟懷璉並補三班奉職孫二人贊華舉進士贊臣尚幼公再娶李氏封隴西縣君秦王儼之第七女也以

某年某月某日終于西京私第某年某月某日葬于某鄉
某里禮也銘曰

神德皇帝駕馭英雄始即南面乃平西戎孰為前蒐時維
我公白水寨碎來蘓路通劔門天險一旦懂蜀既送款
衆尚七萬其誰先之公膺是選擁二十騎揚鞭入見諭以
禍福蜀民舞抃事訖而還王師席卷全蜀雖定群兇未敗
命帝我公歐攘懷柔刺舉一郡警巡七州盜死原野人服
田疇定功議賞理當封侯孰為獍豸唁吠叫謫去泌陽
前勳弗較三月不仕古人相吊矧我公十年不調不調何
熙而笑太祖起之厥官尚微我后增秩暮年有輝徼巡
西洛按察東畿竟坐家事終成罷歸君子知命達人息機

先人敬廬可庇風雨知止知足何思何慮慶見曾孫名揚
先祖謂死為歸預銘厥墓不朽之功永光壠樹

宣徽南院使鎮州都部署郭公墓誌銘并序

郭氏之先號叔之後也號郭聲近因而改焉婚閎軒裳代
為著姓自兩漢兩晉而下其間立大功居顯位者不可脩
書有唐已來孝恪為佐命之將汾陽王子儀代公元振皆
人傑也本大枝茂侍中公當之公諱守文字國華并州太
原人也曾王父諱湛贈太子少保曾祖母劉氏追封彭城
郡夫人大父諱秉贈太子少傅祖母郝氏追封太原郡夫
人皇考諱暉贈太子少師妣趙氏追封天水郡太夫人皆
從公之貴也公即少師之長子少師在漢為護聖軍使從

征蒲帥李守貞先登而歿時公尚幼周高祖見而奇之召
置帳下旌死事之孤也洎授禔元年補左班殿直且以銀
印青綬崇其階級用國子祭酒司憲大夫紀其官氏上騎
都尉策其勲伐起家之命有足優者時廣順二年也世宗
嗣位檢校冬官卿加上柱國時內職東西兩班各置押班
之名又署都知之職公皆任焉顯德中徧歷禮部刑部二
尚書待之雖優用之未至公韜晦而已但以謹愿聞我太
祖神德皇帝之開國也素知其名建隆初遷地官之長充
西頭供奉官三年改大司馬開寶中授大冢宰是時太祖
經營四方有澄清天下之志勵兵謀帥之外所難者乘使
車傳密命之人矣始得公以用之公既以知己之主難逢

亦以使者之才自許往復萬里不逾浹辰敷奏開詳動中
上旨西蜀平以公知簡州軍事夷落未化寇攘孔多公治
盜以威撫人以惠人安盜息公之力焉開寶四年問罪嶺
表公與其行遠馳捷音數日而至授右僕射翰林副使八
年下金陵虜僞主是役也公亦往焉太祖以李煜恃險累
世勞師踰年慮其懼罪自圖有傷國體詔公監送之公待
以周旋加之開釋嘗謂曰國家止吊苗民之頑不責防風
之後也以至俘于端門獻之清廟公之智也太祖嘉之賞
賜殊厚九年二月遷左揆改西京作坊使翰林職司如故
四月封南陽開國男食邑三百戶是歲從曹州節度使党
公禦胡騎于團栢谷大破走之降璽書慰勞今皇帝即位

之始乃作司空太平興國三年以西羗弗寧秦隴搔動詔
公安撫和輯之丁內艱而歸哀毀過禮未幾授起復西上
閣門使上行郊祀之禮霈雷雨之恩俾遷司徒以敷五教
四年上載木主御戎衣討汾晉之邦除腹心之疾以公為
河東行營馬軍都監兼先鋒使時多為地洞以穴其城且
命公提舉經畧之渠魁而縛戎輅凱旋公寔展其力先是
王師之未至也劉繼元以其弟繼文軍于鴈門以張倚角
至是尚守孤壘以招大戎詔公赴之棄城而遁車駕還以
公為定州駐泊兵馬都監冬十月胡馬南下公出禦之遇
于蒲城一鼓而潰遷東上閣門使澶州刺史旌戰功也五
年冬十月復有常山之命會戎人攻我雄州公承急詔領

輕騎以援之狂虜望風而退六年冬上再郊園丘大賚羣
后加金紫階進開國子增食邑五百戶七年奉詔歸朝明
年遷內客省使仍以郡印處之雍熙元年進封開國侯加
食邑一千戶卜郊之澤也二年春二月有并州駐泊之命
三月就遷武州團練使內省之職不解五月夏州白狄之
戎叛公往招誘之至則張以軍威諭以朝旨誅逆撫順蕃
部便之三年春大舉平燕之役以公為幽州道行營前軍
馬步軍水陸戰棹都監其初也繼上捷書累賜優詔公以
暑雨將降師老為憂力戰方酣忽中流矢公聲色不變人
莫知之俄而我師不利朝議左遷授右屯衛大將軍斯蓋
馮異迴溪之敗仁貴大非之失也四年春特拜宣徽北院

使充鎮州駐泊北_面排陣使端拱元年上修帝籍祀先農
恩例之行乃遷太保加食邑一千五百戶改宣徽南院使
夏五月詔許入覲聽其休沐秋八月召詣便殿付以密旨
授鎮州行營_都部署二年五月兼領鎮定高陽關兩路排陣
使百萬之師四七之將萃于是矣公以威愛撫下以謙和
御衆有譽無毀時論多之方將伸威大漠刷恥蹕林焚老
上之庭橫行域外係單于之頸牽致闕下公之志也人之
望也天不憖遺忽焉薨殂以十一月九日捐館于鎮陽公
署享年五十有五上聞之泣下特詔輟朝兩日贈侍中皆
非常例也遣黃門護其喪柩喪事之費給于縣官以淳化
元年某月某日葬于東京某縣某鄉某禮里也公娶梁氏

封安定郡夫人有子四人孟曰崇德承奉郎守太常寺太
祝仲曰崇信叔曰崇儼皆為西頭供奉官季曰崇仁幼而
未仕有後之義其在茲乎女二人長適殿直張永福左千
牛衛將軍再興之子也次許忠武軍節度使太師潘公之
孫未行而卒公學軍旅之事負將帥之才綿歷兩朝遭逢
四主閭外之政多識便宜禁中之言未嘗漏露守封疆則
盡命援桴鼓則忘身家無餘財軍有遺愛降年不永大勲
未立可痛惜哉嘗試論之曰自古畫策安邊銘功絕域者
趙充國班定遠稱為名將然皆年餘七十垂老窮荒而後
能著其効非一朝一夕之故也向使公天假之年如二賢
之壽則醜虜不足平也見托銘勒直書無愧其銘曰

天難謀兮命靡常國不幸兮人之亾公之生兮威加北荒
何以貴之兮駟職彭公之沒兮魂遊東岱何以贈之兮
珥貂煌遺英風兮傳雁塞閔貞魄兮啓牛岡銘真寔兮
昭茂績隨地兮天長

諫議大夫臧公墓誌銘并序

淳化二年春三月詔以右諫議大夫臧公知江陵府事四
月至理所八月得微恙猶視事不輟明年春疾亟不能出
外屏飛奏以聞上命中貴人領御醫乘駟視其病禮之如
將相既而餌藥皆不効肩輿歸京師以五月某日終于私
第年五十三上聞之軫悼且問其嗣或奏曰有子待用未
冠乃授國子四門助教以某年某月某日葬于某州某縣

某鄉某里執友太原王某哭而銘其墓公本諱愚字仲回
因夢先洗馬導從入其第呼公立塔下且命仰視曰老人
星見矣公夢中如教見黃明潤大若圖謀所載者再拜而
寤私喜曰吉祥也以壽星出丙入丁乃名丙字夢壽公年
十七八始執筆為四六文字甚有風彩故兵部侍郎王公
祐以監察御史裏行宰大名之屬邑先洗馬事魏王符公
彥卿為要職每王公詣府必厚為供帳館王于第且出公
拜而以所業師焉王公覽之歎異曰此子可教若進修不
已當為聞人後變格慕韓柳文頗近閩閩既冠丁父母喪
哀毀成疾伏枕者彌年家財鉅萬悉以散朋友親戚視之
糞土如也產將竭而病亦愈遇日者于太行山下言公四

十當成名公信之因落魄于杯酒間又雅善音律章程之
伎為時輩所推服嬉遊任俠者十五餘年上即位之歲一
舉登進士第解褐大理評事通判大寧監之所職者井
為鹽先時主事者悉多逋負械繫不減百人公問其故咸
曰鹽之要在積薪于夏秋煮井于冬春則輯事矣向者官
給柴本錢主事者恣為私用薪既不登鹽將安出公因取
其質而給其價故薪聚如山迄公一政亡被責者受代之
日人為之泣下是歲上親征太原見于行闕授太子右贊
善大夫并寇平以公知遼州軍州事有偽署衙校劫盜于
民者公械送朝廷時以舊染之俗務從寬貸因赦其罪復
補衙職公禮待之且約無再犯不踰月劫盜如故公捕獲

之皆磔裂而徇然後以聞有祕書丞馬汝士者公進士同
年也以本官知石州為政嚴急軍民苦之且與監軍不協
一夕于公署中刺刃在腹而斃遂以自盡奏之公上疏理
其理事其略曰倘明其負罪自裁屍宜更戮苟雪其非辜
致斃魂亦無冤上覽之駭異遽命按其事且召公還便殿
與對上問公曰馬汝士遇害爾知其人乎公曰人則臣不
知言自盡則厚誣也凡人罪非殊死未有棄其生者臣觀
汝士所為略無私過蓋盜憎民怨爾然汝士一夫之命不
足挂聖慮但祕書丞是陛下五品朝官今死既不明宿衛者
亦不加罪臣恐今後書生不能治邊郡上為沉思久之勉
勞使罷留監在京茶庫繼賜錢五十萬遇郊禋加著作郎

大平興國八年拜右拾遺直史館賜銀章朱紱尋知許州
在許三年急吏緩民而已遷河東轉運使積粟餉軍邊用
稱足上籍田之歲以恩例加尚書工部員外郎直史職轉
輸如故歸朝授戶部郎中面賜金紫且詔知審官院事上
重四品官轉司農少卿未幾有大諫荆南之命辭日賜錢
千萬之任多病卧治而已公為人廉直剛決仁義忠信知
止足不苟且與人交禮簡而情至故久而彌篤凡妻之昆
弟姊妹之私壻接之甚謹雖竟月踰年語不及于私褻人
此為難監茶庫時今少府少監雷有終以殿中丞與公同
年事故真定王再入中書權貴德望燠灼天下朝臣得一
見與語者自以為榮公朔望投刺未嘗求見真定使人召

公、未至使愛子羽林大將軍承宗達其意是時某以舉
進士館于公家嘗勸公速往乃修謝啓緘封訖復遷延數
日某問其故公曰趙侍中不樂雷氏衆所知矣今某與雷
同職不告而去恐招物議因白于雷雷果曰此無他欲使
著作伺吾罪釁矣公乃焚其啟終不詣真定其不趨權勢
也如此惜哉不享上壽不登大用命矣夫惜哉不享公之
世祿世功洎昭穆鄉里詳洗馬誌中公即洗馬長子娶張
氏封清河縣君子二人助教長也次曰某女一人適進士
楊雲卿銘曰

胡為乎有生去來兮靡恒吉夢惟星兮竟亦無徵浮生一
夢兮營、薨、夢中之夢夫何憑嗚呼丙父名令圖洛陽

人

故侍御史累贈太子少師李公墓誌銘并序

給事中判河南府兼弔守司事李公將葬先少師走僕求誌其墓行狀云公諱某字某趙郡人廣武君之後也亳州團練使太清宮副使諱幹曾祖也秦陵令贈太子少保諱豐祖也洛州團練判官贈太子少傅諱涵父也公幼孤事母以孝聞有文行為鄉里所稱方將決科名取貴仕邢帥薛懷讓知其名奏觀察支使公以迫于就養不暇擇祿帥移左馮復授記室得五品服色丁母憂護喪歸洛舉先少傅合葬焉制終得塹屋令秩滿歷邠州觀察鳳翔節度使判官尋為朝士推薦入拜殿中侍御史掌梓州權鹽院歸

朝奉詔知舒州軍州事時太祖問罪金陵彌年未下沿淮
諸郡供億百端勤王之功舒寔為最公以悅使民以樂輸
未嘗鞭一人呵一吏而餉饋之用集矣朝廷議其功就加
侍御史以太平興國元年八月二十二日寢疾終于治所
享年若干給事之始登朝也贈某官入西掖又贈某官在
中書超贈太子少師夫人周氏故邢州節度判官琪之女
也以孝謹事先姑以慈嚴訓諸子賢明之行宗族稱之始
封汝南臨潁二縣太君又進封汝南郡太夫人淳化四年
閏十月二十二日終于東京私第四子長曰沆給事是也
次曰贇著作佐郎次曰源太常寺奉禮郎次曰維官與贇
同三女長適武功蘓昌嗣麟遊縣令次適太原王永孚密

州錄事參軍次適沛國朱貽孫皆良塚也以某年某月某日祔葬于西京某縣某鄉某里從先塋禮也公自從事至臺端率以寬簡為政所在吏民愛而思之儒學之外雅好易象老莊之書復能踐其言而行其道外累不入中心晏如居官清不近名直不忤物得俸祿隨手而盡未嘗有意于治生惟教誨諸子蚤夜無倦餘慶鬱積給事當之用是為近臣參大政文章器度時稱巨賢而立朝之士有識少師者必曰給事履行實得父風及罷政事丁外艱而執喪食貧殆不能為禮上聞之歎異賻贈有加維也文學亦如其兄自餘俱成令士三代贈典皆從子貴積善之道豈誣也哉今以二品之禮葬少師之服歛不亦哀且榮乎初給

事直殿館知制誥入內署佐中樞而太夫人尚無恙朝請
之暇兄弟舉觴為壽慈顏既和綵衣起舞盡歡而罷率以
為常每正至入宮壽寧祝聖婦姑相望肩輿煌煌人臣及
母之榮無以過此非父嚴母慈兄良弟悌疇能若斯其盛
歟銘曰

李氏之先廣武稱賢子孫緜：少師燕翼位不克德餘慶
鬱積給事堂：邦家之光庸詎可量既贈其父又封其母
積善之報孝子顯親納石于墳刻為斯文

王黃州小畜集卷第二十八

王叔子語曰
 夫君子之
 德也者
 猶天之
 覆物也
 地之
 載物也
 不可
 一日
 而無
 之也
 夫君子
 之德也
 猶天之
 覆物也
 地之
 載物也
 不可
 一日
 而無
 之也

開化圖書館
 Kaohua Library

王黃州小畜集卷第二十九

碑誌

故商州團練使翟公墓誌銘

殿中丞贈太常少卿桑公神道碑

右衛將軍秦公墓誌銘

殿中丞贈戶部員外郎孫府君墓誌銘

累贈太子洗馬王府君墓誌銘

故商州團練使翟公墓誌銘并序

公諱守素守昭儉濟州任城人也其先蓋漢丞相方進之裔也曾祖諱某皇任某官祖諱某皇任太子少保致仕考某皇任率府率公即率府之次子也天福初以蔭入仕補

左班殿直轉供奉官自晉至漢時亂位卑祇役不暇故勤
雖至而功未立矣洎周高祖以來奉皇華將密命號為稱
職者屈指比數公首與之世宗初平淮甸詔公為蘄州兵
馬監押兼沿江巡檢善修其職改承天軍使自是聲績聞
于時矣我太祖神德皇帝乾德中始議平蜀用許帥王全
斌為主將且擇使臣恭謹者隨軍任使而公實從焉蜀既
平公奉捷書馳駟騎入奏太祖嘉之擢授引進副使時故
中書令石公以佐命元勳始拜平章事鎮汶陽乃詔公為
鄆州生辰國信使賞勞也尋加判四方館事且以全蜀雖
下羣盜未息再命公分屯士卒經畧郡縣乘傳徃復頗得
機宜由是益親信矣開寶中麟府二州蕃族搔動以爭地

不決聞于朝廷公承詔和我部落悅服扈從輦輅薄伐并
門轉引進使出為成都管內十州都巡檢使賜錢五百萬
謝日復受宣充鳳翔府魏王符公官告使公以錫賚優厚
懇讓不已太祖曰汝十州巡警煩費亦多不足讓也當時
寵任在同列間鮮有其比及受代歸朝會淮海王入覲命
公迎勞頗得禮容并寇稽誅大勲未集輯公與洛州防禦
使郭進領偏師侵掠深入敵境至五臺縣界取禾蹂稼實
有力焉今上嗣寶圖行兌澤授客省使憲州刺史會梅山
洞蠻恃險叛亂受詔為都部署招懷討擊五谿悉平淮海
王納版圖奉朝請公為兩浙十三州安撫使尋知杭州軍
州事勞來安輯浙民便之政成召歸為西京都巡檢使因

權知河南府兼留守司事浩穰之政雅亞上都簡事勤公
月餘自理加以修宮闕奉輶轉貴倖旁午終無間言加商
州團練使上念延安戎夏雜處以公麟府之役深識蕃情
知延州軍州事端拱初邊鄙未寧胡羯南牧議者或請堅
壁以待之公以河北諸州繕修城壘遂充天雄軍兵馬鈐
轄知大名府復以上黨近邊素稱難治知潞州軍州事咸
有課最達于朝端上方考古道興方田俾封疆之臣修耕
戰之備公為代北方田都部署事畢改并州兵馬鈐轄移
夏州駐泊未幾知鳳翔府事朝議以趙保忠歸國鎮夏臺
可息經費求其監護無易公者遂再往焉承公上載下頗
叶便宜改石州駐泊上以公馳驅且久齒髮漸高俾歸郡

封以均勞逸在郡周歲方將拜章乞骸歸老田里以淳化
三年八月五日疾終于官舍享年七十一娶張氏封清
河郡君先公而終子二人長某早亡次繼恩右班殿直孫
若干人長惟德商州衙內都指揮使四年四月某日葬于
開封府某縣某鄉某里禮也公歷四朝事八主檢校官自
常侍至大保兼官自監察至大夫階自銀青至光祿勳自
武騎尉至上柱國爵自縣男至郡侯食邑自三百戶至一
千戶惟公謙和畏慎慈惠恭謹積此八者終身不衰嘗莅
大都臨劇務無留事無敗獄以矜嚴訓軍旅以持重守邊
防出疆有專對之才行師無失律之咎世之稱諳練時務
者公寔首焉及治商於郡事尤簡蓋國家優賢養老且休

息之而早夜孜孜未始懈怠若初筮仕者每斷一大辟雖
罪狀明白了無所疑亦必委細諮詢徧乎僚吏以至再三
而後用法復能不忤物不近名奉詔條外不求赫々之譽
知屬吏過失未嘗面言必因公宴引數十年前事曰某人
嘗為某過得某罪旁指曲諭微警誡之周旋慎密率多此
類故能四十年間無纖芥之過始全身于亂世終立事于
清朝語侯伯間未易可得考牘終下不亦休哉某左官商
山實公之副熟聞履行得以直書銘曰
官二千石世祿之厚公能守兮齒七十一人生之壽公能
有兮委質明代保無咎兮歸全幽宅光有後兮

殿中丞贈太常少卿桑公神道碑銘并序

按喪葬令五品已上立碑螭首龜趺高不得過九尺又云
文武五品已上致仕官薨卒者其吊祭賻物依見任殿中
丞品第五太常少卿品第四今雲中留後桑侯葬先少卿
樹碑于神道用舊制也公諱光輔字魯卿其先弘羊以心
計得幸于漢武世居東郡之黎陽徙家于高平鉅野縣周
顯德中以縣為濟州今為郡人焉曾祖某祖某並隱晦不
仕考諱某密莒州縣主簿公即莒縣府君之長子以唐天
祐甲戌歲生于鉅野既冠長七尺風貌峻整襟懷豁如治
三禮窮其淵奧隨鄉舉累上為權勢所軋退耕肄業一不
屑意太平興國初太宗皇帝親試舉人拔孤貧湮厄之士
公始以本科擢第于御前解褐許州鄆城主簿會太宗視

征并壘詔郡縣督民飛輓以餉六師郾城令當行令畏懦
有憂色公曰古人辭易不難辭急病讓夷吾之志也今天
子蒙犯霜露吊伐叛逆臣下宴安之時耶遂詣郡請代令
行事畢賞勞改濰州團練推官祕書省校書郎俄遷大理
評事兼監察御史充泰寧軍節度推官時畱後已掌禁軍
號御龍直以宿衛忠謹恩顧彌渥從容侍立奏曰臣父年
齒甚高為藩郡從事非所樂也臣坐享厚祿不得奉朝夕
之膳心所未足因制授太子左贊善大夫致仕明年轉殿
中丞賜五品服色優游輦下時議榮之以淳化二年六月
十二日寢疾終于上都之官舍享年七十八以畱後貴賻
贈有加是月權宅于法寶寺自淳化四年太宗郊祀至咸

平元年今上嗣位由成均博士累贈奉常亞列大夫張氏
先公而亡追封南陽郡太君子四人長曰贊即留後太傅
次曰某次曰某次曰某女一人適某官以某年某月某日
葬于本縣獲麟鄉休祥里以清和郡太君祔焉禮也公讀
周公孔子之書而道屈于場屋負冉有季路之政而命厄
于州縣積善餘慶留後得之用能會風雲于代邸執干戈
以衛社安邊却敵勢若長城尊主庇民精貫白日善訓之
道有自來矣某鉅野人也為兒童時少卿數來吾家先人
命拜少卿踞受曰童子答某常記之見託勒銘詞實無媿
銘曰

富貴無種善惡有源不在其身在其子孫少卿儒雅留後

藩垣文武之道在公一門公來懸車享茲眉壽何以饋之
肥羜旨酒公去賓職處茲高堂何以貴之赤紱銀章令終
帝里歸葬吾鄉樂卿褒贈壠樹增光刻銘真宅千古流芳

右衛將軍秦公墓誌銘并序

栢翳之盛享國于秦其後子孫或以為姓公諱某字某廬
江人也曾祖某唐末事吳以功為武昌軍節度使事見本
國史祖太岳州刺史父進遠宣州節度副使贈右監門衛
率府率公即率府之長子當李氏建大號也弱冠起家補
殿前承旨仍令禁中侍從先主歿中主嗣位以公為行從
副使益加親信恩寵莫貳公謹儉惕厲卒以無咎中主幸
南昌而終公寔扈從受遺命冊後主于建康禮畢議功將

加不次公三上章願守陵寢情不可奪優詔許之授陵臺
令朝夕洒掃朔望涕泣積十餘歲其志不衰後主聞之頗
為悲慟詔書三下強起公為尚衣使澄心堂祗候澄心堂
後主讌私之所也非親密未嘗至此凡關機務公必與焉
王師吊伐之歲以公為撫州兵馬都監擇才而捍難也師
環金陵城中堅壁時朝廷命浙兵攻其東以公為壽昌殿
使充建州監軍使知軍州事昇州不守亾將盧絳率潰乳
之兵屠歙州殺郡牧遠近為之震駭頓兵富沙逼我城壘
公堅守力戰郡人獲全後主降詔于郡縣曰天命有歸無
復願望且命封府庫以聽朝旨公奉詔哭訖緘符印使次
子羲表納焉太祖嘉其為臣有節完郡有功璽書褒美錫

賚有加以義為右班殿直公歸京師便殿得對恩禮越等授西京作坊使金紫光祿大夫檢校司空兼御史大夫上柱國初江表之平也諸郡守長于蒼黃中侵取官財用以封植後皆自敗並伏其辜惟公束身而歸毫釐無取太宗嗣位素聞其事非時召見慰勞久之賜錢三十萬以本官監白波軍居三年授西京巡檢使賜錢如白波之數歲滿充廣英等十二州巡檢使又賜錢五十萬歸朝改右監門衛將軍爵為開國侯食邑一千五百戶淮南六州巡檢使轉右領軍衛將軍實封二百戶淳化五年歸朝以五月某日寢疾終于私第享年七十八夫人陳氏封潁川縣君以令淑聞于宗族先公而亾三子長曰著舉進士不第而卒

次即義也今為西頭供奉官閣門祗候以才幹為時所推
有後之慶其在茲乎季曰恭亦早夭二女並適人而逝以
某年某月日葬于某州某縣某鄉某里以潁川縣君祔禮
也某與義交甚熟託為銘曰

李氏割據百官備具去就終始公得其所人皆冒榮我守
臺陵銜哀十稔寵詔三徵人去危邦我守孤壘郡民是完
國亡乃已人幸喪亂侵取公財我無一毫空手而來我公
來思二聖念之內職環尹便蕃寵錫人患凶天我獨眉壽
人憂子孫我獨有後天之報施在公匪謬誌墓刻銘水光
世曹

殿中丞贈戶部員外郎孫府君墓誌銘并序

端拱元年正月朔殿中丞富春孫公自龍州受代終于岐
山諸孤護喪權窆于許服闋長子何舉進士中甲科聲名
振天下俄拜右正言直史館賜三品服進階為朝奉郎策
策為騎都尉且命副漕運使于畿甸之西按行數十郡屬
吏故人負弩望塵之不暇今春上郊祀畢以何貴制贈殿
丞府君為尚書戶部員外郎將改葬請進士王巖齋書來
滁上乞銘于工部郎中王某公諱庸字鼎臣其先出于姬
姓春秋時事衛為卿三國時據吳稱伯五代祖植始渡江
為潁川長史高祖簡徙居于蔡曾祖中祖真皆隱德不仕
考諱鎰贈大理評事先妣劉氏追封彭城縣太君皆從公
之貴也公即評事之次子少孤力學舉進士不第退而修

經世之務欲以布衣干天子取顯位而行道此其志也周顯德中徙詣招諫匭上贊聖策凡二十有四條多引貞觀觀時文貞公事以自比世宗覽而奇之命試策于西掖解褐除開封府兵曹參軍會省吏員再考而罷建隆初授河南府河南縣主簿月餘丁彭城太君憂服竟留守向公從民之從以前銜署攝又權司法參軍乾德中調于天官得開封尉以親王出尹而公實事之秩滿考績議當美遷會上言令錄多缺有詔趨吏部亟行補注且曰無限品第因折六資為登州錄事參軍居十載不得代太平興國五年徙官巴蜀會朝達表公之才且稱其滯上亦記公之名始授太子左贊善大夫尋以本官知荆門軍事明年賜緋衣

銀章旌善政而酬久次也移典龍州軍州事雍熙初遷殿
中丞在郡四年得疾肩輿而歸享年六十有七夫人張氏
故國子博士潤之女也先公一年而亾生以夫貴封清河
縣君歿以子貴追封河內縣太君次子僅舉進士文學如
其兄次子侑少秀為詩長女適鄂州錄事叅軍王道隆夫
亾守志次女適進士劉仲堪俊而有文某年某月某日葬
于河南府某縣某鄉某里從廷評府君之塋以河內太君
祔焉禮也昔西漢選用經術晁錯董仲舒以對策高第顯
太宗襄拔王佐劉洎馬周以上書稱旨達戶部其斯人之
徒歟蓋士君子得其時則功成事立大位及于身無其時
則卷道藏器餘慶發于後報若影響曷嘗有差始世宗得

公之策即欲擢升諫垣有沂水人趙守微以草澤上章拜
右拾遺未幾坐家行不修貶高州戶曹掾丞相范魯公謂
公誠有奇才歷試而後用時移事去沉于州縣此一不遇
也故事尉兩畿四赤者滿歲則拜諫官御史由是而為大
寮公獨折資糾郡陸沉者十稔此二不遇也上久在藩邸
僚吏數多即位以來鮮不超擢其間才如孔維者亦至祭
酒而公守道退默未嘗自陳竟以列庶僚典遠郡而終身
焉此三不遇也嗚呼天其或者屈公之位而大公之嗣乎
至于業官之績可以為吏師修身之道可以為人範廉財
慎言出于天性好學博古老而不衰又今人之所不及也
具于家狀此不復書有文集二卷十行于代味其言知其

道矣初廷評府君以通五經隨計于僖宗朝屬巢寇覆二
京而罷干戈之中講誦不輟秦宗權欲引為賓介以疾拒
之夫如是則戶部之賢三英之秀有自來矣先是某為左
司諫知制誥有以何之文相售者見其文有韓柳風格因
夸于同列薦于宰執間居數月何始來候吾又得僅之文
一編時給事中兼右庶子畢公與吾同典誥命適來吾家
因僅出文以示之讀未竟乃大呼曰嚇死老夫矣其為名
賢推服也如此僅之就舉也以兄中狀元抑之未第方今
搢紳中言掌誥之才者咸曰朝廷不命其人則已命之則
必何也場屋中語科第之殊級者亦曰國家罷舉則已舉
不罷則首冠者必僅也吾是以知廷評之積德戶部之道

屈在夫三子矣豈止文學之出人矣又將富貴之逼人
也銘曰

賢人有位止于身貴無時子孫得之廷評素履家食而已
戶部偉才朝班而止貽謀遺志付與三子三子堂：天寶
祐爾賦爾懿文錫爾繁祉翰飛聖朝何啻萬里君子曰孫
氏之諸孤其光顯于宋乎

累贈太子洗馬王府君墓誌銘并序

在昔唐鼎入梁諸侯各專其地就齊魯而言則王師範據
淄青時溥據徐宿朱瑾據兗鄆皆南結吳人以張聲援西
向而拒梁：太祖通和討伐智力殆盡僅能平四州之地
而吳軍北侵益急自清口之敗梁兵縮首不出當時沂密

之民被亂尤甚不死于餒即死于兵非豪傑不能活妻子
况庇其鄉黨乎于是民相保聚離為八寨以捍南寇府君
之祖諱某以負勇敢知禮義為鄉人所推朝廷就署為沿
邊八寨都揮使却敵完民聲入賊境雖吳弩之勁不敢北
射一矢使人得耕桑嫁如治平時後以老病而終府君之
顯考諱某襲父職無懈屬晉氏有平陽之辱中原無主賊
帥趙重將掠高密南奔顯考府君以父子繼職護邊窮迫
不已竟歿于賊衆推府君嗣其事府君諱某字某時年十
八雪泣枕戈期以盡敵不墜世業邑人賴焉既而世宗以
一代英主削平淮夷府君始去兵即農厚自封植僮奴數
百指奔走供事樹桑墾土衣食以豐馬牛豚羊蕃息蔽野

槌鮮釀黍以享賓客聚書講學以教子弟任俠自許弋獵
為娛遊人歸之如公郵里人服之如官府至于縣大夫郡
刺史咸禮重焉嘗歎曰自祖考及吾生在亂世庇民禦寇
其勤寔多未嘗授一官食斗粟報施之道吾有後乎以開
寶六年十月十二日終于家享年四十八始贈大理評事
再贈本寺丞今上即位贈某官夫人劉氏封彭城縣太君
淳化五年以疾終楚州官舍至道二年追封南陽縣太君
婦德母道有史館朱台符為之誌二男長曰子輿字希孟
擢進士第長于辭賦典麗可愛今為殿中侍御史賜五品
章服先是國家以嵯茗漕運之務付于希孟東極溫福西
盡荆湖南距番禺北止淮甸凡半天下悉以委焉希孟裁

量經制咸得中其宿弊舊訛一皆剔削去繁存要公私便
之每一艤舟一就館則郡縣申牒委積如阜待報而返間
不容時加以舊無規繩事有利害希孟閱視剖判遣之如
流施于有司靡不中理所謂幹國之蠱魚人之才者也次
曰未冠而卒五女既嫁而死在室而夭者凡四人焉今存
者潤州司戶參軍劉貞固之妻也以某年某月某日葬于
密州莒縣某鄉某里以南陽太君祔禮也王氏皆帝王之
後居太原者為姬姓隋末大儒號曰文中子府君之先也
六代祖因官密上愛岱嶽東嶽蒙之秀又其俗被周公太
公孔子之化遂家焉至今密人呼忻代王家以別瑯琊
之族夫如是府君其周之苗裔乎某與希孟既為布衣交

又為同恩生重以宗盟情分款密文人之墓所宜為銘曰
姬姓王氏居于太原隋文中子即其裔孫密上因官其後
家焉遇亂習武三世百年府君禦寇無祿無壽陰德所施
宜其有後乃生殿中少登秀茂立朝顯親褒贈禮厚揚名
以道克家惟孝誌墓刻銘永光祖考

王黃州小畜集卷第二十九

五黃... 諸集... 卷二十九

一... 一... 一...

開化圖書館 LIBRARY

王黃州小畜集卷第三十

誌碣

著作佐郎贈國子博士鞠君墓碣銘并序

故泉州錄事叅軍贈太子洗馬陳君墓碣銘

監察御史朱府君墓誌銘

建谿處士贈大理評事柳府君墓碣銘

著作佐郎贈國子博士鞠君墓碣銘并序

鞠氏之先伯禽之裔也世為東萊著姓徙居高密公諱與
今上御名同字可久曾祖某孝悌力田不求聞達祖直登
州黃縣令父慶孫申州團練判官母王氏故太子少師延
之次女左補闕史館修撰贈太師伸之從父妹戶部侍郎

叅知政事贈工部尚書沔之姑也申州府君始娶某氏生子曰恂公即申州次子與弟愉皆王氏出也幼聰悟善屬文溧乾祐中一上登進士第年二十一榜中推為探花先輩解褐秘書校書郎宰相范魯公奏為集賢校理頃之求外官得鄆州觀察支使歷永興軍節度掌書記伊陽猗氏令蔡州防禦判官繼宰介休魏縣開寶五年故相國趙韓王取為著作佐郎與今兵部侍郎兼秘書監楊公徽之兵部郎中知制誥李公若拙故左補闕知制誥趙公隣幾同列東觀當時天下得佐著作局者唯公等四人而已才名地望輝映搢紳居無何授河清令以七年某月某日寢疾終于官舍年四十七夫人于氏太常少卿鵬之次女也太

平興國七年某月某日終于私第年四十七二子長曰仲
謀擢進士第任太常博士次曰仲淵長女適太子中舍鼎
巨川次適故太常丞王禹錫次適鼎巨容初公長兄恂早
亡無嗣弟愉周廣順二年登進士第歷某官倉部員外郎
知制誥張澹以女妻之生子曰孟容季昌女適周氏並早
亡惟季女適靳氏在焉仲容丁母憂時徒步詣申陝河洛
扶護祖考暨叔父母兄孟容五喪東歸致書于我且曰叔
父府君傳父兄之業敦孝友之行顯位未至賦命不融我
先妣太君貞淑慈愛和平均一兩院兒女凡有九人訓撫
提攜並如己子于今鄉人不知有從父兄弟嗟予小子罪
逆不孝祿不及親官忝通籍今奉天子命得封贈父母未

立片石以表墳墓大懼我祖考之遺烈將墜于地幸與足
下布衣之舊豈惜一言不慰罔極之心乎某謝而許之左
宦掖垣憂畏奔迫閏三月九日晨及光州加祿驛晝寢既
酣初夕無寐因命家僮秉燭據行實而書之公舉進士時
著四時成歲賦萬餘言聲振場屋與弟愉並有文集行于
代嗚呼士之處世患才無所取名無所聞才名既立患無
知己惟公負天才得高第復見范魯公趙相國為之引掖
而不登朝籍終于畿令豈非命歟在其子孫必有達者銘

曰

鞠氏姬姓本出于魯世居東萊縫掖章甫明經神童里選
鄉舉擢第業官不可勝數策進士名考登科記大鞠之門

自公而始申州府君文學茂異命屈于時終于從事謀孫
翼子在公昆弟猗嗟我公高才下位伯倫酒德披文見意
王績醉鄉含章遁世歿後二紀贈典方至猶限彝章成均
博士孝子不匱永錫爾類

故泉州錄事參軍贈太子洗馬陳君墓碣銘序

兩漢公卿多補郡吏由督郵功曹而用者十有四五故其
治道鄰于三代蓋考行于鄉試才州于而后登于朝也斯
得鄉里舉選之遺制歟其道雖廢其人或存陳府君近之
矣唐末大亂天下分列東南曰閩有王審知者據之自立
繼以李留張陳凡五帥七十年雖附庸于江南稱藩于中
原其屬吏皆自署也至今鄉人以先輩呼其家君即先輩

府君之子以文行稱于州里閩帥重而辟之君曰吾先人
策名中夏遭時不幸介在偽土義不受祿者全其節也雖
專地悍帥不敢加害名高而行著故也吾小子負荷世未
聞于朝一旦又將拒之禍且至矣人曰吾嘗被天子命無
辱于先人也今時雖可惜而年已過矣吾其樂山水守松
楸而終天年乎乃辭以老而命次子靖入于朝其後終
于家享年七十初靖之歸國也補許州司法叅軍時富春
孫何濟陽丁謂皆當世之文豪也靖與之交用是詞格日
進端拱中拜疏議邊上奇其節授將作監丞主利國監後
隸御史府專以制劾為職皆非所樂也繼上章言時事上
益重之起拜秘書丞直史館四年郊祀畢以靖貴贈府君

洗馬明年秋靖得告南歸且將以漏澤賁其墓、有誌孫
何為文又請尚書禮部員外郎知制誥王杲書墓表杲因
謂曰墓之有表古也然近世有德行無祿位者多表而旌
之據禮子為大夫父為士祭則大夫葬則士今洗馬祕書
俱為五品官而欲表之與無位者同矣何以示貴按令五
品已上立碑七品已上立碣誌其墓宜矣靖乃拜而謝之
君之行已業官理家訓子登偽署之官職卒葬之年月宅
兆之原里五男三女為令子女得嘉壻凡是數者孫之誌
具焉夫人李氏封隴西縣太君亦從子之貴也銘曰
媯姓後穎川陳永嘉亂徙于閩德不墜世有人為從事登
王賓拒偽命名益振生膳部行恂、事連帥姑全身修觀

禮趨紫宸振有蘭佩有銀郡督郵始即真生祕丞文彬
遇聖主文彬為史臣漏斯澤顯斯親時孝子時孝孫碣其
墳垂後昆

監察御史朱府君墓誌銘并序

公諱遵式字咸則初州無極人其先高辛氏有才子八人
朱虎其一也事舜為卿舜命伯益作虞官益讓于虎則盛
德之後從可知矣曾祖儼祖公政皆隱德不仕考思瓊贈
大理司直妣董氏追封隴西縣太君公即司直府君之第
二子也幼而聰悟不為嬉戲始能言即好誦書將舉神童
內艱而罷服闋業文不捨晝夜二十四為權勢所抑周顯
德初翰林承旨兵部侍郎徐公典貢舉褒拔寒俊精覈藝

實公始成名世宗平壽春戎帥楊信奏公為節度推官得
祕書省校書郎兵革之餘瘡痍未復攸助軍政公實盡瘁
太祖開國以恩例試大理評事仍進階一級是歲帥移蒲
津縻以舊職巨才屈乎幕府清議聞諸朝廷于時陝郊有
逋民本府有賦務左馮有旱災皆別勅委公按覆其事操刃
決滯根節迎解乾德三年楊公薨僚佐並隨府罷新帥汾
郭公從義素聞公名弼佐戎政辭避僂就位汾陽一幕
公為未至奉上率下人無間言會詔下督藩臣舉幕吏堪
為升朝官者同舍郎皆從裝俟命汾陽諸侯之賢者也以
為非公不可塞詔第以賓佐故舊之情重難其重事因重
午節請公修詔貢乃密以狀聞左右無能知者拜監察御

史制書先署舉主中書令名銜搢紳以為羨事鹽鐵奏秦
州銀坑比多逋負未入之數不減萬計請擇朝臣以主之
相府以公前佐河中有廉幹之譽遂命監焉乘駟之任復
經舊府汾陽迎于遠郊具藩見臺憲禮輟執御者對控公
馬首小却即按轡懇揖並驅而行蒲人榮之觀者如堵
監銀冶凡八月宿弊盡去羨利居多巴蜀初平呂翰嘯聚
國家憂三峡諸郡以公為涪州通判忠信篤信蠻貊化之
遂知軍州事歲滿相率守關乞畚優詔許之仍降璽書褒
羨開寶五年始受代入憲府掌內彈左補闕宗維忠以本
官知濠梁家富于財輕齎自奉解印之日有白金數千金
兩時輦下用中黃門典關市之稅以為朝官祿薄疑有奸

利卽以事聞太祖方責廉吏養疲民乃下御史府公親劾
之其實家財無賊污狀惟忠請自誣以脫繫獄公不許刺
問履歷未嘗有瀆貨事乃請原其罪太祖召公詰讓曰囊
橐如此非盜于官卽取于民書生相黨耶公曰惟忠始下
獄卽請服罪臣不忍希旨致人于法亂陛下邦憲因抱款
占羅列指摘詞氣不撓太祖怒曰吾將自決此獄安用御
史為遂坐惟忠徒罪叱公使去公執簡而出時無懼色時
太宗皇帝尹京觀公所守甚奇之使人慰勉曰為御史執
法當如是然中外恐懼憂在不測未幾以公監開寶監畏
避雷霆韜戢鋒鏑公餘與賓友縱飲而已八年郊祀畢策
勲柱國太宗嗣位加朝散大夫太興平國二年歸闕屬軍

國事繁未暇進用公微得風恙求判西京留臺遂無商稅
事非所樂也明年得病告歸東京終于私第享年五十五
某年贈某官夫人杜氏宿州刺史儁之女也從夫封京兆
縣君從子追封某縣太君有婦道母德傳于親族府君以
清白指館家無餘貲二男未冠五女未笄居于京師嘗苦
桂玉夫人一切儉約以身率下求師友以訓其子內修工
容以教其女衣服飲食皆有樽節唯買則不問其價以至
抽輟簪珥畧無倦色雅好內典達其旨趣又多智善解夢
言未來事往符驗晝哭之後微有足疾杖而能行及聞
長子登第因投杖而起朱氏之門不墜矣吾為人婦為人
母無負也足疾由是遂瘳見其子昇通籍板輿就養者十

三年以某年某月某日終于舒州年六十九二子長曰九齡祕書省著作佐郎文學政事不墜家法次曰延齡舉進士不第而終五女長嫁殿中丞直集賢院程宿次嫁岳州司理叅軍郭夷簡次嫁張士廉次嫁張士宗並舉進士儒林之秀者也季女未入室以某年某月某日葬于某鄉某里以某縣太君祔焉禮也公負典誥之文止于牋檄有愷悌之政流乎夷落練臺閣之儀老于錢穀時使然也有郭令之慰薦受太宗之殊遇而不及顯位命使然也夫位不充德者其後必大豈誣也哉某與大著作為進士同年請以詞臣之筆誌于丈人之墓誌曰
人恤乎無德不恤乎無位德位俱充惠于困窮匪吾之通

位卑德崇繫于汙隆匪吾之窮展矣朱公抑揚古風策名
筮仕二十五年一入烏府終身不遷餘慶昌繁施及後昆
賢子令孫必大其門刻此清芬銘于九原

建谿處士贈大理評事柳府君墓碣銘并序

有唐以武勦亂以文化人自宰輔公卿至方伯連帥皆用
儒者為之而柳氏最稱顯族故子厚自言其家同時為尚
書郎者三十餘人其盛可知也于時宦遊之士率以東南
為善地每刺一郡殿一邦必得其宗屬子孫占籍于治所
蓋以江山泉石之秀異也至今吳越士人多唐之舊族耳
公諱崇字子高五代祖奧從季父冕廉問閩川因奏署福
州司馬改建州長史遂家焉奧生誕：生瓊：生祚：生

瞪于公為顯考公十歲而孤母夫人丁氏養誨成人既冠
屬王審知據福建以公補沙縣丞時審知殘民自奉人多
衣紙公曰此豈有道之轂耶即以就養引去因自誓終身
御市衣稱處士而已洎李氏奄有江左其長子宜為太子
校書郎江寧尉宰貴谿崇仁建陽三邑拜監察御史次子
宣試大理評事迎公于建康時以宜貴當得致仕官切誠
宜曰不可奏請以卒吾志太祖平吳宜為費宰宣以校書
郎為濟州團練推官公始渡江省諸子自沂至濟自濟至
京師得疾肩輿以歸以太平興國五年十一月某日終于
濟之官舍享年六十三嫡夫人丁氏先公而止追封某縣
太君宜宣之母也宜今為國子博士宣終_于大理司直天平

軍節度推官今夫人虞氏封范陽縣太君生子四人寘宏
舉進士宋察並以辭學自立有後之慶為可知也女五人
皆得嘉婿初公之捐館也博士方按獄于沂聞訃號絕徒
跣冒雪而行以至於濟時有詔不聽吏守三年喪博士負
纒經詣登聞院三上章乞護喪終制寢而不報又叩丞相
馬泣訴其事雖不得請君子是之既而諸弟扶柩以歸權
窆于所居之右以某年某月某日卜葬于某縣某里以先
太君祔焉禮也公以行義著于州里以兢兢嚴治于閨門鄉
人有小忿爭不詣官府決其曲直取公一言諸子諸婦動
修禮法雖從宦千里若公在旁其修身訓子有如此者柳
之姓自履禽始執卷者知之矣今略而不書博士之歸朝

也得雷澤令雷澤某之故里也始以邑中進士見句博士
厚以於我司直之從事于濟也某寓家焉司直善于我又
嘗拜廷評府君于堂上其為交也可謂久矣乞銘公墓義
不可辭銘曰

處士之名兮象著于天廷評之贈兮澤漏于泉子孫文雅
兮後嗣綿：刻銘墓石兮以永千年

王黃州小畜集卷第三十

五萬餘冊
 一
 二
 三
 四
 五
 六
 七
 八
 九
 十
 十一
 十二
 十三
 十四
 十五
 十六
 十七
 十八
 十九
 二十
 二十一
 二十二
 二十三
 二十四
 二十五
 二十六
 二十七
 二十八
 二十九
 三十
 三十一
 三十二
 三十三
 三十四
 三十五
 三十六
 三十七
 三十八
 三十九
 四十
 四十一
 四十二
 四十三
 四十四
 四十五
 四十六
 四十七
 四十八
 四十九
 五十
 五十一
 五十二
 五十三
 五十四
 五十五
 五十六
 五十七
 五十八
 五十九
 六十
 六十一
 六十二
 六十三
 六十四
 六十五
 六十六
 六十七
 六十八
 六十九
 七十
 七十一
 七十二
 七十三
 七十四
 七十五
 七十六
 七十七
 七十八
 七十九
 八十
 八十一
 八十二
 八十三
 八十四
 八十五
 八十六
 八十七
 八十八
 八十九
 九十
 九十一
 九十二
 九十三
 九十四
 九十五
 九十六
 九十七
 九十八
 九十九
 一百

開化圖書館
 (Carhuallibrary)

內翰王公以文章道義被遇太宗皇帝視草北門代言西掖眷接優隆聲望最重咸謂咫尺黃閣矣偶坐事左遷咸平初來守齊安在郡政化孚洽容與暇景作竹樓無愠齋睡足軒以玩意邦人沐浴恩惠為繪像立祠東坡居士嘗親拜其下歷歲滋久經涉兵盜無一存者風範歇絕音徽眇然良可太息平生撰著極富有手編文集三十卷名曰小畜集其文簡易醇質得古作者之體好往、好事者得之珍祕不傳以故人多未見虞鄉假守于此追訪舊址躊躇增慨想見其人思欲以次興葺而鈍拙無能救過不贍輒且先其大者因以家笥所藏小畜集善本更加點勘鳩工鏤板以廣其傳庶與四方學者共之紹興丁卯皇上祀

紫壇之明年六月庚申歷陽沈虞卿書

[Faint bleed-through text from the reverse side of the page, including characters like '開', '化', '圖', '書']

黃州契勘諸路州軍間有印書籍去處竊見王黃州小畜
集文章典雅有益後學所在未曾開板今得舊本計一十
六萬三千八百四十八字檢准紹興令諸私雕印文書先
納所屬申轉運司選官詳定有益學者聽印行除依上條
申明施行今具雕造小畜集一部共八冊計四伯三十二
板合用紙墨工價下項

甲書紙并副板四伯四十八張表背碧青紙一十一張
大紙八張共錢二伯六文足賃板棧墨錢五伯文足裝
印工食錢四伯三十文足除印書紙外共計錢一貫一
伯三十六文足見成出賣每部價錢五貫文省

右具如前

紹興十七年七月

日校正承節郎光黃州巡轄馬通鋪周郁

校正左從政郎司理叅軍李儼

校正右政從郎錄事叅軍李彬

校正左從政郎州學教授梅守卓


監雕造右文林郎軍事推官宗亞昌

監雕造右文林郎軍事判官王傑

右朝奉郎通判軍州事胡玠

左朝散大夫權知軍州事沈虞卿

予少時得元之詩文數篇讀而善之銳欲見其全集遍覓
不可得既知有板梓于黃州託其州人覓之又不得去歲
入長安從相國葉進卿先生借得內府宋本疾讀數過甚
快因鈔而藏之今學為詩者未能窺此老藩籬而動彈射
宋人至不遺餘力此與以耳食者何以異悲夫
萬曆庚戌三月望日晉安後學謝肇淛敬跋



開化圖書館

kuahua library

去冬聞坊友傳言云有宋刻王黃州不畜集流轉郡中既
而遇諸吟攤果宋刻其缺者皆吾研齋補鈔不知誰
何也末有謝聲淵跋云未和果爲其手跡抑係傳錄
存之物王居奇識直未能收得目雖遇心未止心頃又
念及遂重索觀見卷中遇留字皆缺最後一畫以
字無黨手鈔他書禮之寫留字作留疑出口口鈔
也余竊疑有鈔本硬方三十卷爲六十二以沈慶卿
後翁居而失去前王自序并無後之牒文官銜則
鈔本之不出宋刻遠甚明代並無刊本故傳鈔亦
鮮昔漁洋山人曾見估人攜來一本率以未得爲憾
余故勉力購此全書四佰餘葉宋刻居三之一古色古
香不礙爲斷珪瑛璧也交易既成書友云遍示郡中

諸收藏家未識此書何以尊貴都不欲收今君得
此如獲頭目請問其詳余應之曰書必宋刻方敢
信宋刻雖不至據謝跋知鈔補亦宋本前人斷
不誑語略取荏苒藏鈔本勤字句實有勝處豈
以鈔補為瑕之掩瑜邪宋刻本有野竹山泉吳郡沈
文沈辨之各印鈔補本有惠公不紅皇兩方印明与
國朝是書舊在吾郡人弓人得欣幸何如其餘
和齋光翰等印皆不可考矣僕与各研齋名
徐訪之
道光紀元三月三日又為寒食荒夫曉燭書

書前跋畢復檢汲古閣書目知所藏侯翁
生鈔本以有東澗及趙法常筆迹故表之
則未嘗所得本有沈辨字及惠名定字諸
處所書不似舊珍重所至字刻之有
分一又堪以傲汲古矣附記一笑 堯夫

未信此書為三無堂之鈔也書證之始知之其啟心者
研齋補鈔向未和此齋為何人齋名後略江鎮品
舉此問之而余言其詳乃知印書堂之齋名也因而
考研齋四品始知之後而筆卷中先輪和齋等印詢
之云先輪和齋村原名和齋似之若多也也所不知乃和
之字之所以書和字向也也其書堂之為和言四月古後記

余既得此刻^宋補鈔本因手校一過余向所藏鈔本生一本
某者注二与宋刻合而余友所得吳校卷校鈔本在乾隆
二年晉中刻年上其符款与宋刻同云亦出宋刻惜更
謬誤者皆星初時妄改身吳校而擬抄本云出自唐
石丁二未火書可也余友者張君誠善也雖言校書
甚精而後信此本去校遺也札云補抄卷中亦有脫
衍詞字惜抄之者未精詳也人若不知言得見宋初
本之信其不完為遺恨不知方塘間為有定本存白
染而二之簽出在第七册紙中似作佛毫筆前之字
疑与本事之全之元之用書典頗有誤也板前校本
已疑也兩條恐不也於此也云一抄以車好書苦心
愛惜近日故交零落講究藏書者絕無其人誠
幾為碩果一在故載其言以當暇云端午日聞
能美夫識

小畜集札記

卷一 十二行葉前 上四年之疑 十行後 十惟巖巖當 十四行葉前 魚

兮 四兮字 脫

卷二 五行葉前 岡象 岡當 五行葉後 氏作氏當

卷三 二行葉後 軟軟 軟當 輪 九行葉後 之甘鮮 作之當

卷五 二行葉前 寺開化者 寺下疑 九行情磬 之情疑 清 三行葉後

冷冷 當冷作 嶧山 此二抹 以字下行 原文有墨筆 一行葉後 今昔 作今當

行退易 易當作 六行葉後 離腸 腸疑 八行葉前 植枝 枝當

卷六 十二行葉前 春乖 乖當 十一宿醒 醒當 十三行葉前 百世者

作者當 十四行葉前 敵八詠 敵疑 敵 十一行 鶴渚 之鶴疑 鄂 六葉

行碯 碯當 後一 秋源 源當 潦

卷七 八行葉後 塾屋 塾當 屋 九行葉前 藥羅 羅當 八行 渾疑 疑當

行後九 尸假 假疑 解 四十行葉前 蘇檣 檣當 前十一行 窻船 船當 窻

前十二行葉張精靈張下脫 ○十三行葉塵上上當 ○十吏歸疑歸字

前十六行葉竹齋院院上脫 ○十九行葉下日日當 老來來疑去

後三行葉棠畔畔疑誤字 ○後五行葉公宴虎虎當 ○前九行葉聯藥聯疑

後三十一行葉送入閣下送疑誤字 ○六葉前曾添添當 ○十去孔姬疑去

卷八 一四行葉後郊郊當 ○三行葉前曾添添當 ○十去孔姬疑去

法之 ○後五行葉娉婷娉當 ○七刺自隳疑自誤字 ○九搏風伏

雌一伏字上缺 ○七葉後王澤深深疑潤 ○八葉前蛟力山難難下

脫一 ○後三鳥省省當 ○六丹書書疑筆 ○八投行行當

九葉後因嚇嚇因當 ○六曾揚鬢曾疑會 ○十二葉誰宦誰疑

謫之 ○行早舍舍疑合 蘭任一蘭下脫 ○十四葉力耕

力當 ○十六葉前抵見見疑誤字 ○十八葉後青山山疑 ○十二

葉後子規啼啼疑鳴 ○二十四行葉生舌意舌當 ○十一草野

野當草作

卷九

五十葉前行上疑誤字 ○ 六行釣輪作輪當 ○ 後二石埃疑誤字 ○

十一行葉前從令作令當 ○ 十二行葉落葉當作 ○ 十三行注葉前例首

主簿作首當 ○ 六行天艷作天當 ○ 十八行離歲作離當

卷十

四葉前異鬚作異當 ○ 後八歸滄江脫去字疑 ○ 十行大卿

作大當 ○ 十一行重腫作腫當 ○ 六行注亦詔疑誤字 ○ 九行葉前之丞

丞當作 ○ 後五入詠樓作入當 ○ 十六行唯吟把情把吟情 ○ 後

行武麟步臺當作武臺 ○ 十九行葉母別當作 ○ 二十行葉依十韻

作十當 ○ 五行議舌作舌當

卷十一

三行葉前翻翅輕翅上脫 ○ 七行迴掉作掉當 ○ 後八柴門

門疑關 ○ 六行葉前史君之史疑使 ○ 後二滿須當作 ○ 七行葉前

鄰妬之妬疑妓 ○ 六行為吾疑吾字 ○ 八行前呼在在疑作 ○ 十葉

行番隅作隅當 ○ 十二行葉後空斷疑斷字 ○ 十三行葉金戀作戀當 ○

行八令夕作令當 ○ 後九澤吟作吟當 ○ 十四行葉新日磨作磨當 ○ 七十

葉前年號標歷武宗一句脫○十八葉詩益淒然詩下脫○十九

葉前七聚院疑院字○後四腰下如懸疑如字○八歸田田下脫

卷十二六葉後桃著作桃姚當○九葉前抵壁捐金壁當

卷十六八葉前碑合於道碑當○九易且俗矣且當○後一

姑能姑當○九葉前教今今當○前二行車野土車當○十

葉前號立立當

卷十七七葉後剗鉄鉄疑缺○九葉前走九九當

卷十八五葉前商於人之命人字

卷二十五葉後特曰前序公公當

卷二十一十五葉前者眾惡考當

卷二十五二葉後萬作疑邦○三葉前固負疑二字○四葉

行一啓某當作○五葉前在如當在○六葉後浮口疑名○

九葉前帝墳墳當○後二夜行之者疑者字○十葉後凡閣當凡

凡作 ○ 行七 幸甚謹 ○ 謹字下脫 ○ 行十一 挂籍 ○ 挂當

卷二十六 三行葉前 城長里 ○ 萬字上脫 ○ 六行葉前 賦德 ○ 德當作

卷二十七 十三行葉後 難試 ○ 試當作難 ○ 四行葉後 天王 ○ 王字疑誤 ○ 五行葉前

揚名孝 ○ 孝當者 ○ 後行十 賢不居 ○ 賢上脫 ○ 六行葉後 採櫓 ○ 櫓當

八行葉後 載拊 ○ 拊下脫 ○ 十一行 唯淳朴 ○ 淳下疑

卷二十八 三行葉後 于長 ○ 于當 ○ 三行葉前 三檢校尚書 ○ 三下疑

七行葉後 東呼 ○ 呼字疑誤 ○ 八行葉前 未士 ○ 士疑亡 ○ 後六行 通遠軍 ○ 下軍

脫使 ○ 十一行 其于 ○ 于疑餘 ○ 九行葉前 漢之寵官 ○ 漢當 ○ 後一行

私等 ○ 等當 ○ 十行葉前 歇冠 ○ 歇疑鶻 ○ 後三行 萬古蕭瑟 ○ 行四字

行十部知兵馬使 ○ 部當 ○ 十一行葉前 晉氏 ○ 行二字 ○ 後五行 韓保負 ○ 負當

真 ○ 十五行葉後 矧我公 ○ 矧字下脫 ○ 不調何 ○ 一句脫 ○ 二十行葉後 塾

屋 ○ 當屋作

卷二十九 十四行葉前 視征 ○ 視當 ○ 八行葉前 從民之從 ○ 下從字

十葉後四行都揮使都下疑 ○十一葉後四行魚人魚當 ○四五次曰下曰

字有脫

卷三十三葉後人曰作人當 ○四葉前八行為令子為上脫 ○後十

二十四句有 ○五葉前九行從裝從疑促 ○後七篤信 ○六信當

後七樽節樽當 唯買買下疑

跋前七好往：好上好

此書初印收用經鋤堂鈔本訛奪極多讀者病之重印廣求善本先後收得汪閬源徐紫珊兩鈔本復從杭州葉氏借得汪魚亭鈔本趙孰典刻本最近觀書常熟瞿氏鐵琴銅劍樓始覩此本借歸比對五本之中此為最勝宋槧存卷十二至十六卷十八至二十四凡十二卷藏印累累尚為前明沈辨之家故物宋本傳世已盡於此餘卷為吾研齋依謝氏小草齋鈔本補足書中留字闕筆黃堯翁一再

跋之考定出呂無黨手闕筆避呂氏家諱著錄士禮居藏
書題跋記乃是書第一善本也因廢經鋤堂版而代之呂
鈔集末仍載謝氏跋文稱從相國葉進卿先生借得內府
宋本鈔藏云云此從謝鈔再傳猶是根源天水宜其高出
羣本也惟魯魚帝虎雖宋刻名鈔偶亦不免因就札錄諸
本校記中擇其最善者存之集部不同經史不復誌采自
某本聊為讀古書者示門徑以云校勘則未敢也已巳霜
降海鹽張元濟

開化圖書館

Wakuhwa Library

開化圖書館

Kaichua library



開化圖書館

Kaichua library




開化圖書館

Waihua Library

開化圖書館

Kaichwa library




小
畜
集
六

開
他
圖
書
館
Kashima Library

開化圖書

Kaithua Library



TIFFEN® Color Control Patches

© The Tiffen Company, 2007

Blue Cyan Green Yellow Red Magenta White 3/Color